



ਚੰਡੀ ਚਰਿਤ੍ਰ ਦੂਸਰਾ

ੴ ਵਾਹਿਗੁਰੂ ਜੀ ਕੀ ਫਤੇ ॥

ਅਥ ਚੰਡੀ ਚਰਿਤ੍ਰ ਲਿਖਯਤੇ ॥

ਨਰਾਜ ਛੰਦ ॥

ਮਹਿੱਖ ਦਈਤ ਸੂਰਯੰ ॥ ਬਢਿਯੋ ਸੁ

ਲੋਹ ਪੂਰਯੰ ॥ ਸੁ ਦੇਵ ਰਾਜ ਜੀਤਯੰ ॥

ਤ੍ਰਿਲੋਕ ਰਾਜ ਕੀਤਯੰ ॥੧॥ ਭਜੇ ਸੁ

ਦੇਵਤਾ ਤਬੈ ॥ ਇਕੱਤ੍ਰ ਹੋਇ ਕੈ ਸਬੈ ॥

ਮਹੇਸੁਰਾ ਚਲੰ ਬਸੇ ॥ ਬਿਸੇਖ ਚਿਤ ਮੋ

ਤ੍ਰਸੇ ॥੨॥ ਜੁਗੋਸ ਭੇਸ ਧਾਰ ਕੈ ॥ ਭਜੇ

ਹਥਿਆਰ ਡਾਰ ਕੈ ॥ ਪੁਕਾਰ ਆਰਤੰ

ਚਲੇ ॥ ਬਿਸੂਰ ਸੂਰਮਾ ਭਲੇ ॥੩॥

ਬਰਖ ਕਿਤੇ ਤਹਾਂ ਰਹੇ ॥ ਸੁ ਦੁਖ ਦੇਹ
ਮੋ ਸਹੇ ॥ ਜਗਤ੍ਰ ਮਾਤਿ ਧਿਆਯੰ ॥ ਸੁ
ਜੈਤ ਪੱਤ੍ਰ ਪਾਯੰ ॥੪॥ ਪ੍ਰਸੰਨ ਦੇਵਤਾ
ਭਏ ॥ ਚਰੰਨ ਪੂਜਬੇ ਧਏ ॥ ਸਨੰਮੁਖਾਨ
ਠੱਢੀਅੰ ॥ ਪ੍ਰਣਾਮ ਪਾਠ ਪੱਢੀਅੰ ॥੫॥
ਰਸਾਵਲ ਛੰਦ ॥

ਤਬੈ ਦੇਵ ਧਾਏ ॥ ਸਭੋ ਸੀਸ
ਨਿਆਏ ॥ ਸੁਮਨ ਧਾਰ ਬਰਖੇ ॥ ਸਬੈ
ਸਾਧ ਹਰਖੇ ॥੬॥ ਕਰੀ ਦੇਬਿ ਅਰਚਾ
॥ ਬ੍ਰਹਮ ਬੇਦ ਚਰਚਾ ॥ ਜਬੈ ਪਾਇ
ਲਾਗੇ ॥ ਤਬੈ ਸੋਗ ਭਾਗੈ ॥੭॥ ਬਿਨੰਤੀ

ਸੁਨਾਈ ॥ ਭਵਾਨੀ ਰਿਝਾਈ ॥ ਸਬੈ
ਸਸਤ੍ਰ ਧਾਰੀ ॥ ਕਰੀ ਸਿੰਘ ਸੁਆਰੀ
॥੮॥ ਕਰੇ ਘੰਟ ਨਾਦੰ ॥ ਧੁਨੰ ਨਿਰ
ਬਿਖਾਦੰ ॥ ਸੁਣਯੋ ਦੈਈਤ ਰਾਜੰ ॥
ਸਜਿਓ ਜੁੱਧ ਸਾਜੰ ॥੯॥ ਚੜਿਓ
ਰਾਛਸੇਸੰ ॥ ਰਚੇ ਚਾਰ ਅਨੇਸੰ ॥ ਬਲੀ
ਚਾਮਰੇਵੰ ॥ ਹਠੀ ਚਿੱਛੁਰੇਵੰ ॥੧੦॥
ਬਿੜਾਲੱਛ ਬੀਰੰ ॥ ਚੜੇ ਬੀਰ ਧੀਰੰ ॥
ਬਡੇ ਇੱਖੁ ਧਾਰੀ ॥ ਘਟਾ ਜਾਨ ਕਾਰੀ
॥੧੧॥

ਦੋਹਰਾ

ਬਾਣਿ ਜਿਤੇ ਰਾਛਸਨਿ ਮਿਲਿ

ਛਾਡਤ ਭਏ ਅਪਾਰ ॥ ਫੂਲ ਮਾਲ ਹੁਐ

ਮਾਤ ਉਰ ਸੋਭੇ ਸਭੇ ਸੁ ਧਾਰ ॥੧੨॥

ਭੁਜੰਗ ਪ੍ਰਯਾਤ ਛੰਦ ॥

ਜਿਤੇ ਦਾਨਵੋ ਬਾਨ ਪਾਨੀ ਚਲਾਏ ॥

ਤਿਤੇ ਦੇਵਤਾ ਆਪ ਕਾਟੇ ਬਚਾਏ ॥

ਕਿਤੇ ਢਾਲ ਢਾਹੇ ਕਿਤੇ ਪਾਸ ਪੇਲੇ ।

ਭਰੇ ਬਸਤ੍ਰ ਲੋਹੁ ਜਨੋ ਫਾਗ ਖੇਲੇ ॥੧੩॥

ਦੁਗਾਹੁੰ ਕੀਯੰ ਖੇਤ ਧੁੰਕੇ ਨਗਾਰੇ ॥ ਕਰੰ

ਪੱਟਿਸੰ ਪਰਘ ਪਾਂਸੀ ਸੰਭਾਰੇ ॥ ਤਹਾਂ

ਗੋਫਨੈ ਗੁਰਜ ਗੋਲੇ ਸੰਭਾਰੈਂ ॥ ਹਠੀ

ਮਾਰਗੀ ਮਾਰ ਕੈ ਕੈ ਪੁਕਾਰੈਂ ॥੧੪॥
ਤਬੈ ਅਸਟ ਅਸਟਾਬ ਹਥਿਆਰੰ ਸੰਭਾਰੇ
॥ ਸਿਰੰ ਦਾਨਵੇਂਦ੍ਰਾਨ ਕੇ ਤਾਕ ਝਾਰੇ ॥
ਬਬੱਕਿਓ ਬਲੀ ਸਿੰਘ ਜੁਧੰ ਮਝਾਰੰ ॥
ਕਰੇ ਖੰਡ ਖੰਡੰ ਸੁ ਜੋਧਾ ਅਪਾਰੰ ॥੧੫॥

ਤੋਟਕ ਛੰਦ ॥

ਤਬ ਦਾਨਵ ਰੋਸ ਭਰੇ ਸਭ ਹੀ ॥
ਜਗ ਮਾਤਿ ਕੇ ਬਾਣ ਲਗੇ ਜਬ ਹੀ ॥
ਬਿਬਧਾਯੁਧ ਲੈ ਸੁ ਬਲੀ ਹਰਖੇ ॥ ਘਨ
ਬੁੰਦਨ ਜਿਉਂ ਬਿਸਖੰ ਬਰਖੇ ॥੧੬॥ ਜਨੁ
ਘੋਰ ਕੈ ਸਿਆਮ ਘਟਾ ਘੁਮਡੀ ॥

ਅਸੁਰੇਸ ਅਨੀ ਕਨਿ ਤਿਉ ਉਮਡੀ ॥
ਜਗ ਮਾਤ ਬਿਰੂਥਨਿ ਮੋ ਧਸਿਕੈ ॥
ਧਨੁਸਾਇਕ ਹਾਥ ਗਹਿਓ ਹਸਿ ਕੈ
॥੧੭॥ ਰਣ ਕੁੰਜਰ ਪੁੰਜ ਗਿਰਾਇ ਦੀਏ
॥ ਇਕ ਖੰਡ ਅਖੰਡ ਦੁਖੰਡ ਕੀਏ ॥
ਸਿਰ ਏਕਨਿ ਚੋਟ ਨਿਫੋਟ ਬਹੀ ॥
ਤਰਵਾ ਤਰ ਹੁਐ ਤਰਵਾਰ ਰਹੀ ॥੧੮॥
ਤਨ ਝੱਝਰ ਹੁਐ ਰਣ ਭੂਮ ਗਿਰੇ ॥
ਇਕ ਭਾਜ ਚਲੇ ਫਿਰ ਕੈ ਨ ਫਿਰੇ ॥
ਇਕਿ ਹਾਥ ਹਥਿਆਰ ਲੈ ਆਨ ਬਹੇ ॥

ਲਰਿ ਕੈ ਮਰਿ ਕੈ ਗਿਰਿ ਖੇਤ ਰਹੇ
॥੧੯॥

ਨਰਾਜ ਛੰਦ॥

ਤਹਾਂ ਸੁ ਦੈਤ ਰਾਜਯੰ ॥ ਸਜੇ ਸੁ
ਸਰਬ ਸਾਜਯੰ ॥ ਤੁਰੰਗ ਆਪ ਬਾਹੀਯੰ
॥ ਬਧੰ ਸੁ ਮਾਤ ਚਾਹੀਯੰ ॥੨੦॥ ਤਬੈ
ਦੁਗਾ ਬਕਾਰਿ ਕੈ ॥ ਕਮਾਣ ਬਾਣ ਧਾਰਿ
ਕੈ ॥ ਸੁ ਘਾਵ ਚਾਮਰੰ ਕੀਯੋ ॥ ਉਤਾਰ
ਹਸਤਿ ਤੇਂ ਦੀਯੋ ॥੨੧॥

ਭੁਜੰਗ ਪ੍ਰਯਾਤ ਛੰਦ ॥

ਤਬੈ ਬੀਰ ਕੋਪੰ ਬਿੜਾਲਾਛ ਨਾਮੰ ॥

ਸਜੇ ਸਸਤ੍ਰ ਦੇਹੰ ਚਲੇ ਜੁੱਧ ਧਾਮੰ ॥

ਸਿਰੰ ਸਿੰਘ ਕੇ ਆਨ ਘਾਯੰ ਪ੍ਰਹਾਰੰ ॥

ਬਲੀ ਸਿੰਘ ਸੋ ਹਾਥ ਸੋ ਮਾਰਿ ਡਾਰੰ

॥੨੨॥ ਬਿੜਾਲਾਛ ਮਾਰੇ ਸੁ ਪਿੰਗਾਛ

ਧਾਏ ॥ ਦੁਰਗਾ ਸਾਮੁਹੇ ਬੋਲ ਬਾਂਕੇ

ਸੁਨਾਏ ॥ ਕਰੀ ਅਭ੍ਰ ਜਿਉਂ ਗਰਜ ਕੈ

ਬਾਣ ਬਰਖੰ ॥ ਮਹਾਂ ਸੂਰ ਬੀਰੰ ਭਰੇ

ਜੁੱਧ ਹਰਖੰ ॥੨੩॥ ਤਬੈ ਦੇਵੀਅੰ ਪਾਣ

ਬਾਣੰ ਸੰਭਾਰੰ ॥ ਹਨਿਯੋ ਦੁਸਟ ਕੇ ਘਾਇ

ਸੀਸੰ ਮਝਾਰੰ ॥ ਗਿਰਿਯੋ ਝੂਮ ਭੂਮੰ ਗਏ

ਪ੍ਰਾਣ ਛੁੱਟੰ ॥ ਮਨੋ ਮੇਰ ਕੋ ਸਾਤਵੋਂ ਸਿੰਗ
ਟੁੱਟੰ ॥੨੪॥ ਗਿਰੇ ਬੀਰ ਪਿੰਗਾਛ ਦੇਬੀ
ਸੰਘਾਰੇ ॥ ਚਲੇ ਅਉਰ ਬੀਰੰ ਹਥਿਆਰੰ
ਉਘਾਰੇ ॥ ਤਬੈ ਰੋਸ ਦੇਬਿਯੰ ਸਰੋਘੰ
ਚਲਾਏ ॥ ਬਿਨਾ ਪ੍ਰਾਣ ਕੈ ਜੁੱਧ ਮੱਧੰ
ਗਿਰਾਏ ॥੨੫॥

ਚੌਪਈ ॥

ਜੇ ਜੇ ਸਤ੍ਰੁ ਸਾਮੁਹੇ ਆਏ ॥ ਸਬੈ
ਦੇਵਤਾ ਮਾਰ ਗਿਰਾਏ ॥ ਸੈਨਾ ਸਕਲ
ਜਬੈ ਹਨਿ ਡਾਰੀ ॥ ਆਸੁਰੇਸ ਕੋਪਾ
ਅਹੰਕਾਰੀ ॥੨੬॥ ਆਪ ਜੁੱਧ ਤਬ

ਕੀਆ ਭਵਾਨੀ ॥ ਚੁਨ ਚੁਨ ਹਨੇ
ਪਖਰੀਆ ਬਾਨੀ ॥ ਕ੍ਰੋਧ ਜੁਆਲ
ਮਸਤਕ ਤੇ ਬਿਗਸੀ ॥ ਤਾ ਤੇ ਆਪ
ਕਾਲਿਕਾ ਨਿਕਸੀ ॥੨੭॥

ਮਧੁਭਾਰ ਛੰਦ ॥

ਮੁਖ ਬਮਤ ਜੁਆਲ ॥ ਨਿਕਸੀ
ਕਪਾਲ ॥ ਮਾਰੇ ਗਜੇਸ ॥ ਛੁੱਟੇ ਹੈ ਏਸ
॥੨੮॥ ਛੁੱਟੰਤ ਬਾਣ ॥ ਝਮਕਤ
ਕ੍ਰਿਪਾਣ ॥ ਸਾਂਗੰ ਪ੍ਰਹਾਰ ॥ ਖੇਲਤ
ਧਮਾਰ ॥੨੯॥ ਬਾਹੈਂ ਨਿਸੰਗ ॥ ਉੱਠੈਂ
ਝੜੰਗ ॥ ਤੁੱਪਕ ਤੜਾਕ ॥ ਉੱਠਤ

ਕੜਾਕ ॥੩੦॥ ਬਬਕੰਤ ਮਾਇ ॥
ਭਭਕੰਤ ਘਾਇ ॥ ਜੁੱਝੇ ਜੁਆਣ ॥ ਨੱਚੇ
ਕਿਕਾਣ ॥੩੧॥

ਰੂਆਮਲ ਛੰਦ ॥

ਧਾਯੋ ਅਸੁਰੇਂਦ੍ਰ ਤਹ ਨਿਜ ਕੋਪ ਓਪ
ਬਢਾਇ ॥ ਸੰਗ ਲੈ ਚਤੁਰੰਗ ਸੈਨਾ ਸੁੱਧ
ਸਸਤ੍ਰ ਨਚਾਇ ॥ ਦੇਬਿ ਸਸਤ੍ਰ ਲਗੈਂ
ਗਿਰੇ ਰਣ ਰੁੱਝਿ ਜੁੱਝਿ ਜੁਆਣ ॥ ਪੀਲ
ਰਾਜ ਫਿਰੇ ਕਹੂੰ ਰਣ ਸੁੱਛ ਛੁੱਛ ਕਿਕਾਣ
॥੩੨॥ ਚੀਰ ਚਾਮਰ ਪੁੰਜ ਕੁੰਜਰ ਬਾਜ
ਰਾਜ ਅਨੇਕ॥ ਸਸਤ੍ਰ ਅਸਤ੍ਰ ਸੁਭੇ ਕਹੂੰ

ਸਰਦਾਰ ਸੁਆਰ ਅਰੇਕ ॥ ਤੇਗ ਤੀਰ
 ਤੁਫੰਗ ਤਬਰ ਕੁਹੁਕ ਬਾਣ ਅਨੰਤ ॥
 ਬੇਧਿ ਬੇਧਿ ਗਿਰੇ ਬਰੱਛਿਨ ਸੂਰ ਸੋਭਾਵੰਤ
 ॥੩੩॥ ਗ੍ਰਿਧ ਬ੍ਰਿਧ ਉਡੇ ਤਹਾਂ ਫਿਕਰੰਤ
 ਸੁਆਨ ਸਿੰਗ੍ਰਾਲ ॥ ਮੱਤ ਦੰਤ ਸਪੱਛ
 ਪੱਬੈ ਕੰਕ ਬੰਕ ਰਸਾਲ ॥ ਛੁੱਦ੍ਰ ਮੀਨ
 ਛੁਰੁਧ੍ਰਕਾ ਅਰ ਚਰਮ ਕੱਛਪ ਅਨੰਤ ॥
 ਨੱਕ੍ਰ ਬੱਕ੍ਰ ਸੁ ਬਰਮ ਸੋਭਿਤ ਸ੍ਰੋਣ ਨੀਰ
 ਦੁਰੰਤ ॥੩੪॥ ਨਵ ਸੂਰ ਨਵਕਾ ਸੇ
 ਰਥੀ ਅਤ ਰਥੀ ਜਾਨ ਜਹਾਜ ॥ ਲਾਦਿ
 ਲਾਦਿ ਮਨੋ ਚਲੇ ਧਨ ਧੀਰ ਬੀਰ ਸਲਾਜ

॥ ਮੋਲੁ ਬੀਚ ਫਿਰੈਂ ਚੁਕਾਤ ਦਲਾਲ ਖੇਤ
 ਖਤੰਗ ॥ ਗਾਹਿ ਗਾਹਿ ਫਿਰੇ ਫਵੱਜਨਿ
 ਝਾਰਿ ਦਿਰਬ ਨਿਖੰਗ ॥੩੫॥ ਅੰਗ
 ਭੰਗ ਗਿਰੇ ਕਹੂੰ ਬਹੁ ਰੰਗ ਰੰਗਿਤ ਬਸਤ੍ਰ
 ॥ ਚਰਮ ਬਰਮ ਸੁਭੇ ਕਹੂੰ ਰਣ ਭੂਮਿ
 ਸਸਤ੍ਰ ਰੁਅਸਤ੍ਰ ॥ ਮੁੰਡ ਤੁੰਡ ਧੁਜਾ
 ਪਤਾਕਾ ਟੂਕ ਟਾਕ ਅਰੇਕ ॥ ਜੂਝ ਜੂਝ
 ਪਰੇ ਸਬੈ ਅਰਿ ਬਾਚਿਓ ਨਹੀ ਏਕ
 ॥੩੬॥ ਕੋਪ ਕੈ ਮਹਿਖੇਸ ਦਾਨੋ ਧਾਯੋ
 ਤਿਹ ਕਾਲ ॥ ਅਸਤ੍ਰ ਸਸਤ੍ਰ ਸੰਭਾਰ
 ਸੂਰੋ ਰੂਪ ਕੈ ਬਿਕਰਾਲ ॥ ਕਾਲਿ ਪਾਣ

ਕ੍ਰਿਪਾਣ ਲੈ ਤਿਹ ਮਾਰਿਓ ਤਤਕਾਲ ॥
ਜੋਤਿ ਜੋਤਿ ਬਿਖੈ ਮਿਲੀ ਤਜ ਬ੍ਰਹਮ
ਰੰਧਿ ਉਤਾਲ ॥੩੭॥

ਦੋਹਰਾ ॥ ਮਹਿਖਾਸੁਰ ਕਹ ਮਾਰ
ਕਰ ਪ੍ਰਫੁਲਤ ਭੀ ਜਗ ਮਾਇ ॥ ਤਾ
ਦਿਨ ਤੇਂ ਮਹਿਖੇ ਬਲੈਂ ਦੇਤ ਜਗਤ ਸੁਖ
ਪਾਇ ॥੩੮॥

ਇਤਿ ਸ੍ਰੀ ਬਚਿਤ੍ਰ ਨਾਟਕੇ ਚੰਡੀ ਚਰਿਤ੍ਰੇ
ਮਹਿਖਾਸੁਰ ਬਧਹਿ ਪ੍ਰਥਮ ਧਿਆਇ ਸੰਪੂਰਣ

ਮਸਤੁ ਸੁਭ ਮਸਤੁ ॥੧॥

॥ ਅਫਜੂ ॥

ਅਥ ਧੂਮ੍ ਨੈਨ ਜੁਧ ਕਥਨੰ ॥

ਕੁਲਕ ਛੰਦ ॥

ਦੇਵਿਸ ਤਬ ਗਾਜੀਯ। ਅਨਹਦ
ਬਾਜੀਯ ॥ ਭਈ ਬਧਾਈ ॥ ਸਭ
ਸੁਖਦਾਈ ॥੧॥੩੯॥ ਦੁੰਦਭ ਬਾਜੇ ।
ਸਭ ਸੁਰ ਗਾਜੇ ॥ ਕਰਤ ਬਡਾਈ ॥
ਸੁਮਨ ਬ੍ਰਖਾਈ ॥੨॥੪੦॥ ਕੀਨੀ ਬਹੁ
ਅਰਚਾ ॥ ਜਸ ਧੁਨਿ ਚਰਚਾ ॥ ਪਾਇਨ
ਲਾਗੇ ॥ ਸਭ ਦੁਖ ਭਾਗੇ ॥੩॥੪੧॥
ਗਾਏ ਜੈ ਕਰਖਾ ॥ ਪੁਹਪਨਿ ਬਰਖਾ ॥
ਸੀਸ ਨਿਵਾਏ ॥ ਸਬ ਸੁਖ ਪਾਏ
॥੪॥੪੨॥

ਦੋਹਰਾ ॥ ਲੋਪ ਚੰਡਕਾ ਜੂ ਭਏ ਦੈ
ਦੇਵਨ ਕੋ ਰਾਜ ॥ ਬਹੁਰ ਸੁੰਭ ਨੈਸੁੰਭ
ਦੁਇ ਦੈਤ ਬਢੇ ਸਿਰ ਤਾਜ ॥੫॥੪੩॥

ਚੋਪਈ ॥ ਸੁੰਭ ਨਿਸੁੰਭ ਚੜੇ ਲੈ ਕੇ
ਦਲ ॥ ਅਰਿ ਅਨੇਕ ਜੀਤੇ ਜਿਨ ਜਲ
ਥਲ ॥ ਦੇਵ ਰਾਜ ਕੋ ਰਾਜ ਛਿਨਾਵਾ ॥
ਸੇਸ ਮੁਕਟ ਮਨਿ ਭੇਟ ਪਠਾਵਾ
॥੬॥੪੪॥ ਛੀਨ ਲਯੋ ਅਲਕੇਸ ਭੰਡਾਰਾ
॥ ਦੇਸ ਦੇਸ ਕੇ ਜੀਤ ਨ੍ਰਿਪਾਰਾ ॥ ਜਹਾਂ
ਤਹਾਂ ਕਹ ਦੈਤ ਪਠਾਏ ॥ ਦੇਸ ਬਿਦੇਸ
ਜੀਤ ਫਿਰ ਆਏ ॥੭॥੪੫॥

ਦੋਹਰਾ ॥ ਦੇਵ ਸਭੈ ਤ੍ਰਾਸਿਤ ਭਏ
ਮਨ ਮੋ ਕੀਓ ਬਿਚਾਰ ॥ ਸਰਨਿ
ਭਵਾਨੀ ਕੀ ਸਭੈ ਭਾਜਿ ਪਰੇ ਨਿਰਧਾਰ
॥੮॥੪੬॥

ਨਰਾਜ ਛੰਦ ॥

ਸੁ ਤ੍ਰਾਸ ਦੇਵ ਭਾਜੀਯੰ ॥ ਬਿਸੇਖ
ਲਾਜ ਲਾਜੀਯੰ ॥ ਬਿਸਿਖ ਕਾਰਮੰ ਕਸੇ
॥ ਸੁ ਦੇਵ ਲੋਕ ਮੋਂ ਬਸੇ ॥੯॥੪੭॥
ਤਬੈ ਪ੍ਰਕੋਪ ਦੇਬਿ ਹੁਐ ॥ ਚਲੀ ਸੁ
ਸਸਤ੍ਰ ਅਸਤ੍ਰ ਲੈ ॥ ਸੁ ਮੁੱਦ ਪਾਨਿ ਪਾਨ

ਕੈ ॥ ਗਜੀ ਕ੍ਰਿਪਾਨ ਪਾਨ ਲੈ
॥੧੦॥੪੮॥

ਰਸਾਵਲ ਛੰਦ ॥

ਸੁਨੀ ਦੇਵ ਬਾਨੀ ॥ ਚੜ੍ਹੀ ਸਿੰਘ
ਰਾਨੀ ॥ ਸੁਭੰ ਸਸਤ੍ਰ ਧਾਰੇ ॥ ਸਭੈ ਪਾਪ
ਟਾਰੇ ॥੧੧॥੪੯॥ ਕਰੇ ਨੱਦ ਨਾਦੰ ॥
ਮਹਾਂ ਮੱਦ ਮਾਦੰ ॥ ਭਯੋ ਸੰਖ ਸੋਰੰ ॥
ਸੁਣਯੋ ਚਾਰ ਓਰੰ ॥੧੨॥੫੦॥ ਉਤੇ
ਦੈਤ ਧਾਏ ॥ ਬਡੀ ਸੈਨ ਲਿਆਏ ॥
ਮੁਖੰ ਰਕਤ ਨੈਣੰ ॥ ਬਕੇ ਬੰਕ ਬੈਣੰ
॥੧੩॥੫੧॥ ਚਵੰ ਚਾਰ ਢੂਕੇ ਮੁਖੰ ਮਾਰ

ਕੂਕੇ ॥ ਲਏ ਬਾਣ ਪਾਣੰ ॥ ਸੁ ਕਾਤੀ
ਕ੍ਰਿਪਾਣੰ ॥੧੪॥੫੨॥ ਮੰਡੇ ਮੱਧ ਜੰਗੰ ॥
ਪ੍ਰਹਾਰੰ ਖਤੰਗੰ ॥ ਕਰਉਤੀ ਕਟਾਰੰ ਉਠੀ
ਸਸਤ੍ਰੁ ਝਾਰੰ ॥੧੫॥੫੩॥ ਮਹਾਂ ਬੀਰ
ਧਾਏ ॥ ਸਰੋਘੰ ਚਲਾਏ ॥ ਕਰੈਂ ਬਾਰ
ਬੈਰੀ ॥ ਫਿਰੇ ਜਿਉ ਗੰਗੈਰੀ
॥੧੬॥੫੪॥

ਭੁਜੰਗ ਪ੍ਰਯਾਤ ਛੰਦ ॥

ਕਰੋਧਤ ਸਟਾਯੰ ਉਤੈ ਸਿੰਘ ਧਾਯੋ ॥

ਇਤੈ ਸੰਖ ਲੈ ਹਾਥ ਦੇਵੀ ਬਜਾਯੋ ॥

ਪੁਰੀ ਚਉਦਹੁੰਯੰ ਰਹਿਓ ਨਾਦ ਪੂਰੰ ॥

ਚਮੱਕਿਓ ਮੁਖੰ ਜੁੱਧ ਕੇ ਮਧਿ ਨੂਰੰ
 ॥੧੭॥੫੫॥ ਤਬੈ ਧੂਮ੍ ਨੈਣੰ ਮਚਿਓ
 ਸਸਤ੍ਰ ਧਾਰੀ ॥ ਲਏ ਸੰਗ ਜੋਧਾ ਬਡੇ
 ਬੀਰ ਭਾਰੀ ॥ ਲਯੋ ਬੇੜ੍ਹਿ ਪੱਬੰ ਕੀਯੋ
 ਨਾਦ ਉੱਚੰ ॥ ਸੁਣੇ ਗਰਭਣੀਆਨ ਕੇ
 ਗਰਭ ਮੁੱਚੰ ॥੧੮॥੫੬॥ ਸੁਣਿਓ ਨਾਦ
 ਸ੍ਰਵਣੰ ਕੀਯੋ ਦੇਵਿ ਕੋਪੰ ॥ ਸਜੇ ਚਰਮ
 ਬਰਮੰ ਧਰੇ ਸੀਸ ਟੋਪੰ ॥ ਭਈ ਸਿੰਘ
 ਸੁਆਰੰ ਕੀਯੋ ਨਾਦ ਉੱਚੰ ॥ ਸੁਨੇ ਦੀਹ
 ਦਾਨਵਾਨ ਕੇ ਮਾਨ ਮੁੱਚੰ ॥੧੯॥੫੭॥
 ਮਹਾਂ ਕੋਪ ਦੇਵੀ ਧਸੀ ਸੈਨ ਮੱਧੰ ॥ ਕਰੇ

ਬੀਰ ਬੰਕੇ ਤਹਾ ਅੱਧ ਅੱਧੰ ॥ ਜਿਸੈ
ਧਾਇ ਕੈ ਸੂਲ ਸੈਥੀ ਪ੍ਰਹਾਰਯੋ ॥ ਤਿਨੈ
ਫੇਰਿ ਪਾਣੰ ਨ ਬਾਣੰ ਸੰਭਾਰਯੋ
॥੨੦॥੫੮॥

ਰਸਾਵਲ ਛੰਦ ॥

ਜਿਸੈ ਬਾਣ ਮਾਰਿਓ ॥ ਤਿਸੈ ਮਾਰ
ਡਾਰਿਓ ॥ ਜਿਤੈ ਸਿੰਘ ਧਾਯੋ ॥ ਤਿਤੈ
ਸੈਨ ਘਾਯੋ ॥੨੧॥੫੯॥ ਜਿਤੇ ਘਾਇ
ਡਾਲੇ ॥ ਤਿਤੇ ਘਾਰਿ ਘਾਲੇ ॥ ਸਮੁਹ
ਸਤੁ ਆਯੋ ॥ ਸੁ ਜਾਨੇ ਨ ਪਾਯੋ
॥੨੨॥੬੦॥ ਜਿਤੇ ਜੁਝ ਰੁੱਝੇ ॥ ਤਿਤੇ

ਅੰਤ ਜੁੱਝੇ ॥ ਜਿਨੈ ਸਸਤ੍ਰ ਘਾਲੇ ॥
ਤਿਤੇ ਮਾਰ ਡਾਲੇ ॥੨੩॥੬੧॥ ਤਬੈ
ਮਾਤ ਕਾਲੀ ॥ ਤਪੀ ਤੇਜ ਜੁਵਾਲੀ ॥
ਜਿਸੈ ਘਾਵ ਡਾਰਿਯੋ ॥ ਸੁ ਸੁਰਗੰ
ਸਿਧਾਰਿਯੋ ॥੨੪॥੬੨॥ ਘਰੀ ਅੱਧ
ਮੱਧੰ ॥ ਹਨਿਯੋ ਸੈਨ ਸੁੱਧੰ ॥ ਹਨਯੋ ਧੂਮ੍
ਨੈਣੰ ॥ ਸੁਨਯੋ ਦੇਵ ਗੈਣੰ ॥੨੫॥੬੩॥

ਦੋਹਰਾ ॥ ਭਜੀ ਬਿਰੂਥਨ ਦਾਨਵੀ
ਗਈ ਭੂਪ ਕੇ ਪਾਸ ॥ ਧੂਮ੍ ਨੈਣ ਕਾਲੀ
ਹਨਯੋ ਭਜੀਯੋ ਸੈਨ ਨਿਰਾਸ
॥੨੬॥੬੪॥

ਇਤਿ ਸ੍ਰੀ ਬਚਿਤ੍ਰ ਨਾਟਕੇ ਚੰਡੀ ਚਰਿਤ੍ਰੇ ਧੂਮ੍ ਨੈਣ
ਬਧਹਿ ਦੁਤੀਆ ਧਿਆਇ ਸੰਪੂਰਣ ਮਸਤੁ ਸੁਭ
ਮਸਤੁ ॥੨॥

ਅਫਜੂ॥

ਅਥ ਚੰਡ ਮੁੰਡ ਜੁੱਧ ਕਥਨੰ ॥

ਦੋਹਰਾ ॥ ਇਹ ਬਿਧ ਦੈਤ ਸੰਘਾਰ
ਕਰ ਧਵਲਾ ਚਲੀ ਅਵਾਸ ॥ ਜੋ ਯਹ
ਕਥਾ ਪੜ੍ਹੈ ਸੁਨੈ ਰਿਧਿ ਸਿਧਿ ਗ੍ਰਿਹ ਤਾਸ
॥੧॥੬੫॥

ਚਉਪਈ ॥ ਧੂਮ੍ ਨੈਣ ਜਬ ਸੁਣੇ
ਸੰਘਾਰੇ ॥ ਚੰਡ ਮੁੰਡ ਤਬ ਭੂਪ ਹਕਾਰੇ ॥
ਬਹੁ ਬਿਧਿ ਕਰ ਪਠਏ ਸਨਮਾਨਾ ॥ ਹੈ

ਗੈ ਪਤਿ ਦੀਏ ਰਥ ਨਾਨਾ ॥੨॥੬੬॥
ਪ੍ਰਿਥਮ ਨਿਰਖਿ ਦੇਬੀਅਹਿ ਜੇ ਆਏ ॥
ਤੇ ਧਵਲਾ ਗਿਰ ਓਰ ਪਠਾਏ ॥ ਤਿਨ
ਕੀ ਤਨਕ ਭਨਕ ਸੁਨਿ ਪਾਈ ॥
ਨਿਸਿਰੀ ਸਸਤ੍ਰ ਅਸਤ੍ਰ ਲੈ ਮਾਈ
॥੩॥੬੭॥

ਰੂਆਲ ਛੰਦ ॥

ਸਾਜਿ ਸਾਜਿ ਚਲੇ ਤਹਾਂ ਰਣ
ਰਾਛਸੇਂਦ੍ਰ ਅਨੇਕ ॥ ਅਰਧ ਮੁੰਡਿਤ
ਮੁੰਡਿਤੇਕ ਜਟਾ ਧਰੇ ਸੁ ਅਰੇਕ ॥ ਕੋਪਿ
ਓਪੰ ਦੈ ਸਬੈ ਕਰ ਸਸਤ੍ਰ ਅਸਤ੍ਰ ਨਚਾਇ

॥ ਧਾਇ ਧਾਇ ਕਰੈਂ ਪ੍ਰਹਾਰਨ ਤਿੱਛ
 ਤੇਗ ਕੰਪਾਇ ॥੪॥ ੬੮॥ ਸਸਤ੍ਰ
 ਅਸਤ੍ਰ ਲਗੇ ਜਿਤੇ ਸਭ ਫੂਲ ਮਾਲ ਹੁਐ
 ਗਏ ॥ ਕੋਪ ਓਪ ਬਿਲੋਕਿ ਅਤਿਭੁਤ
 ਦਾਨਵੰ ਬਿਸਮੈ ਭਏ ॥ ਦਉਰ ਦਉਰ
 ਅਨੇਕ ਆਯੁਧ ਫੇਰ ਫੇਰ ਪ੍ਰਹਾਰਹੀਂ ॥
 ਜੂਝ ਜੂਝ ਗਿਰੇ ਅਰੇਕ ਸੁ ਮਾਰ ਮਾਰ
 ਪੁਕਾਰਹੀਂ ॥੫॥੬੯॥ ਰੇਲ ਰੇਲ ਚਲੇ
 ਹਏਂਦ੍ਰਨ ਪੇਲ ਪੇਲ ਗਜੇਂਦ੍ਰ ॥ ਝੇਲ ਝੇਲ
 ਅਨੰਤ ਆਯੁਧ ਹੇਲ ਹੇਲ ਰਿਪੇਂਦ੍ਰ ॥
 ਗਾਹਿ ਗਾਹਿ ਫਿਰੇ ਫਵੱਜਨ ਬਾਹਿ ਬਾਹਿ

ਖਤੰਗ ॥ ਅੰਗ ਭੰਗ ਗਿਰੇ ਕਹੂੰ ਰਣ
 ਰੰਗ ਸੂਰ ਉਤੰਗ ॥੬॥੨੦॥ ਝਾਰ ਝਾਰ
 ਫਿਰੈ ਸਰੋਤਮ ਡਾਰਿ ਝਾਰਿ ਕ੍ਰਿਪਾਨ ॥
 ਸੈਲ ਸੇ ਰਣ ਪੁੰਜ ਕੁੰਜਰ ਸੂਰ ਸੀਸ
 ਪਖਾਨ ॥ ਬੱਕ ਨੱਕ ਭੁਜਾ ਸੁ ਸੋਭਤ
 ਚੱਕ ਸੇ ਰਥ ਚੱਕ ॥ ਕੇਸ ਪਾਸ ਸਿਬਾਲ
 ਸੋਹਤ ਅਸਥ ਚੂਰ ਸਰੱਕ ॥੨॥੨੧॥
 ਸੱਜਿ ਸੱਜਿ ਚਲੇ ਹਥਿਆਰਨ ਗੱਜਿ
 ਗੱਜਿ ਗਜੇਂਦ੍ਰ ॥ ਬੱਜਿ ਬੱਜਿ ਸਬੱਜ
 ਬਾਜਨ ਭੱਜਿ ਭੱਜਿ ਹਏਂਦ੍ਰ ॥ ਮਾਰ ਮਾਰ
 ਪੁਕਾਰ ਕੈ ਹਥੀਆਰ ਹਾਥ ਸੰਭਾਰ ॥

ਧਾਇ ਧਾਇ ਪਰੇ ਨਿਸਾਚਰ ਬਾਇ ਸੰਖ
 ਅਪਾਰ ॥੮॥੭੨॥ ਸੰਖ ਗੋਯਮੰ ਗੱਜੀਯੰ
 ਅਰ ਸੱਜੀਯੰ ਰਿਪ ਰਾਜ ॥ ਭਾਜਿ ਭਾਜਿ
 ਚਲੇ ਕਿਤੇ ਤਜ ਲਾਜ ਬੀਰ ਨ੍ਰਿਲਾਜ ॥
 ਭੀਮ ਭੇਰੀ ਭੁੰਕੀਅੰ ਅਰੁ ਧੁੰਕੀਅੰ ਸੁ
 ਨਿਸਾਣ ॥ ਗਾਹਿ ਗਾਹਿ ਫਿਰੇ ਫਵੱਜਨ
 ਬਾਹਿ ਬਾਹਿ ਗਦਾਣ ॥੯॥੭੩॥ ਬੀਰ
 ਕੰਗਨੇ ਬੰਧਹੀਂ ਅਰੁ ਅੱਛਰੈਂ ਸਿਰ ਤੇਲ
 ॥ ਬੀਨ ਬੀਨ ਬਰੇ ਬਰੰਗਨਿ ਡਾਰਿ
 ਡਾਰਿ ਫੁਲੇਲ ॥ ਘਾਲਿ ਘਾਲਿ ਬਿਵਾਨ
 ਲੇ ਗੀ ਫੇਰ ਫੇਰ ਸੁ ਬੀਰ ॥ ਕੂਦਿ ਕੂਦਿ

ਪਰੇ ਤਹਾਂ ਤੇ ਝਾਗਿ ਝਾਗਿ ਸੁ ਤੀਰ
 ॥੧੦॥੨੪॥ ਹਾਂਕਿ ਹਾਂਕਿ ਲਰੇ ਤਹਾਂ
 ਰਣ ਰੀਝਿ ਰੀਝਿ ਭਟੇਂਦ੍ਰ ॥ ਜੀਤਿ
 ਜੀਤਿ ਲਯੋ ਜਿਨ੍ਹੈ ਕਈ ਬਾਰ ਇੰਦ੍ਰ
 ਉਪੇਂਦ੍ਰ ॥ ਕਾਟਿ ਕਾਟਿ ਦਏ ਕਪਾਲੀ
 ਬਾਂਟਿ ਬਾਂਟਿ ਦਿਸਾਨ ॥ ਡਾਟਿ ਡਾਟਿ
 ਕਰੱਦਲੰ ਸੁਰ ਪੱਗੁ ਪੱਬ ਪਿਸਾਨ
 ॥੧੧॥੨੫॥ ਧਾਇ ਧਾਇ ਸੰਘਾਰੀਯੰ
 ਰਿਪੁ ਰਾਜ ਬਾਜ ਅਨੰਤ ॥ ਸ੍ਰੇਣ ਕੀ
 ਸਰਤਾ ਉਠੀ ਰਣ ਮੱਧਿ ਰੂਪ ਦੁਰੰਤ ॥
 ਬਾਣ ਅਉਰ ਕਮਾਣ ਸੈਥੀ ਸੂਲ ਤਿੱਛ

ਕੁਠਾਰ ॥ ਚੰਡ ਮੁੰਡ ਹਣੇ ਦੋਊ ਕਰ ਕੋਪ
ਕਾਲਿ ਕਰ ਵਾਰ ॥੧੨॥੭੬॥

ਦੋਹਰਾ ॥ ਚੰਡ ਮੁੰਡ ਮਾਰੇ ਦੋਊ
ਕਾਲੀ ਕੋਪ ਕਰ ਵਾਰ ॥ ਅਉਰ ਜਿਤੀ
ਸੈਨਾ ਹੁਤੀ ਛਿਨ ਮੋ ਦਈ ਸੰਘਾਰ
॥੧੩॥੭੭॥

ਇਤਿ ਸ੍ਰੀ ਬਚਿਤ੍ਰ ਨਾਟਕੇ ਚੰਡੀ ਚਰਿਤ੍ਰੇ ਚੰਡ ਮੁੰਡ
ਬਧਹਿ ਤ੍ਰਿਤੀਯੋ ਧਿਆਇ ਸੰਪੂਰਣ ਮਸਤ ਸੁਭ
ਮਸਤੁ ॥੩॥

ਅਫਜੂ ॥

ਅਥ ਰਕਤ ਬੀਰਜ ਜੁੱਧ ਕਥਨੰ ॥

ਸੋਰਠਾ ॥ ਸੁਨੀ ਭੂਪ ਇਮ ਗਾਥ
ਚੰਡ ਮੁੰਡ ਕਾਲੀ ਹਨੇ ॥ ਬੈਠ ਭ੍ਰਾਤ ਸੋ
ਭ੍ਰਾਤ ਮੰਤ੍ਰ ਕਰਤ ਇਹ ਬਿਧ ਭਏ
॥੧॥੨੮॥

ਚਉਪਈ ॥ ਰਕਤ ਬੀਜ ਤਬ ਭੂਪ
ਬੁਲਾਯੋ ॥ ਅਮਿਤ ਦਰਬ ਦੈ ਤਹਾਂ
ਪਠਾਯੋ ॥ ਬਹੁ ਬਿਧਿ ਦਈ ਬਿਰੂਥਨਿ
ਸੰਗਾ ॥ ਹੈ ਗੈ ਰਥ ਪੈਦਲ ਚਤੁਰੰਗਾ
॥੨॥੨੯॥ ਰਕਤ ਬੀਜ ਦੈ ਚਲਯੋ
ਨਗਾਰਾ ॥ ਦੇਵ ਲੋਗ ਲਉ ਸੁਨੀ
ਪੁਕਾਰਾ ॥ ਕੰਪੀ ਭੂਮਿ ਗਗਨ ਥਹਰਾਨਾ

॥ ਦੇਵਨ ਜੁਤ ਦਿਵ ਰਾਜ ਡਰਾਨਾ
 ॥੩॥੮੦॥ ਧਵਲਾ ਗਿਰ ਕੇ ਜਬ ਤਟ
 ਆਏ ॥ ਦੁੰਦਭਿ ਢੋਲ ਮ੍ਰਿਦੰਗ ਬਜਾਏ ॥
 ਜਬ ਹੀ ਸੁਨਾ ਕੁਲਾਹਲ ਕਾਨਾ ॥
 ਉਤਰੀ ਸਸਤ੍ਰ ਅਸਤ੍ਰ ਲੈ ਨਾਨ੍ਹਾ
 ॥੪॥੮੧॥ ਛਹਬਰ ਲਾਇ ਬਰਖੀਯੰ
 ਬਾਣੰ ॥ ਬਾਜ ਰਾਜ ਅਰੁ ਗਿਰੇ ਕਿਕਾਣੰ
 ॥ ਢਹਿ ਢਹਿ ਪਰੇ ਸੁਭਟ ਸਿਰਦਾਰਾ ॥
 ਜਨ ਕਰ ਕਟੇ ਬਿਰਛ ਸੰਗ ਆਰਾ
 ॥੫॥੮੨॥ ਜੇ ਜੇ ਸੱਤ੍ਰੁ ਸਾਮੁਹੇ ਭਏ ॥
 ਬਹੁਰ ਜੀਅਤ ਗ੍ਰਿਹ ਕੋ ਨਹੀ ਗਏ ॥

ਜਿਹ ਪਰ ਪਰਤ ਭਈ ਤਰਵਾਰਾ ॥
ਇਕ ਇਕ ਤੇ ਭਏ ਦੋ ਦੋ ਚਾਰਾ
॥੬॥੮੩॥

ਭੁਜੰਗ ਪ੍ਰਯਾਤ ਛੰਦ ॥

ਝਿਮੀ ਤੇਜ ਤੇਗੰ ਸੁ ਰੋਸੰ ਪ੍ਰਹਾਰੰ ॥

ਖਿਮੀ ਦਾਮਨੀ ਜਾਣ ਭਾਦੋਂ ਮਝਾਰੰ ॥

ਉਠੇ ਨੱਦ ਨਾਦੰ ਕੜੱਕੇ ਕਮਾਣੰ ॥

ਮਚਿਯੋ ਲੋਹ ਕ੍ਰੋਹੰ ਅਭੂਤੰ ਭਯਾਣੰ

॥੭॥੮੪॥ ਬਜੇ ਭੇਰ ਭੇਰੀ ਜੁਝਾਰੇ

ਝਣੱਕੇ ॥ ਪਰੀ ਕੁੱਟ ਕੁੱਟੰ ਲਗੇ ਧੀਰ

ਧੱਕੇ ॥ ਚਵੀ ਚਾਵਡੀਯੰ ਨਫੀਰੰ ਰਣੱਕੰ

॥ ਮਨੋ ਬਿੱਚਰੰ ਬਾਘ ਬੰਕੇ ਬਬੱਕੰ
 ॥੮॥੮੫॥ ਉਤੇ ਕੋਪੀਯੰ ਸ੍ਰੋਣ ਬਿੰਦੰ ਸੁ
 ਬੀਰੰ ॥ ਪ੍ਰਹਾਰੇ ਭਲੀ ਭਾਂਤ ਸੋ ਆਨ
 ਤੀਰੰ ॥ ਉਤੇ ਦਉਰ ਦੇਵੀ ਕਰਯੋ ਖੱਗ
 ਪਾਤੰ ॥ ਗਿਰਯੋ ਮੂਰਛਨਾ ਹੁਐ ਭਯੋ
 ਜਾਨੁ ਘਾਤੰ ॥੯॥੮੬॥ ਛੁਟੀ
 ਮੂਰਛਨਾਯੰ ਮਹਾ ਬੀਰ ਗੱਜਯੋ ॥ ਘਰੀ
 ਚਾਰ ਲੋ ਸਾਰ ਸੋ ਸਾਰ ਬੱਜਯੋ ॥ ਲਗੇ
 ਬਾਣ ਸ੍ਰੋਣੰ ਗਿਰਯੋ ਭੂਮਿ ਜੁੱਧੰ ॥ ਉਠੇ
 ਬੀਰ ਤੇਤੇ ਕੀਏ ਨਾਦ ਕੁੱਧੰ
 ॥੧੦॥੮੭॥ ਉਠੇ ਬੀਰ ਜੇਤੇ ਤਿਤੇ

ਕਾਲਿ ਕੂਟੇ ॥ ਪਰੇ ਚਰਮ ਬਰਮੰ ਕਹੂੰ
 ਗਾਤ ਟੂਟੇ ॥ ਜਿਤੀ ਭੂਮਿ ਮਧੰ ਪਰੀ
 ਸ੍ਰੋਣ ਧਾਰੰ ॥ ਜਗੇ ਸੂਰ ਤੇਤੇ ਕੀਏ ਮਾਰ
 ਮਾਰੰ ॥੧੧॥੮੮॥ ਪਰੀ ਕੁੱਟ ਕੁੱਟੰ ਰੁਲੇ
 ਤੱਛ ਮੁੱਛੰ ॥ ਕਹੂ ਮੁੰਡ ਤੁੰਡੰ ਕਹੂੰ ਮਾਸੁ
 ਮੁਛੰ ॥ ਭਯੋ ਚਾਰ ਸੈ ਕੋਸ ਲੋ ਬੀਰ ਖੇਤੰ
 ॥ ਬਿਦਾਰੇ ਪਰੇ ਬੀਰ ਬਿੰਦੰ ਬਿਚੇਤੰ
 ॥੧੨॥੮੯॥

ਰਸਾਵਲ ਛੰਦ ॥

ਚਹੂੰ ਓਰ ਢੂਕੇ ॥ ਮੁਖੰ ਮਾਰ ਕੂਕੇ
 । ਝੰਡਾ ਗੱਢ ਗਾਢੇ ॥ ਮਚੇ ਰੋਸ ਬਾਢੇ

॥੧੩॥੯੦॥ ਭਰੇ ਬੀਰ ਹਰਖੰ ॥ ਕਰੀ
 ਬਾਣ ਬਰਖੰ ॥ ਚਵੰ ਚਾਰ ਢੁੱਕੇ ॥ ਪਛੇ
 ਆਹੁ ਰੁੱਕੇ ॥੧੪॥੯੧॥ ਪਰੀ ਸਸਤ੍ਰ
 ਝਾਰੰ ॥ ਚਲੀ ਸ੍ਰੋਣ ਧਾਰੰ ॥ ਉਠੇ ਬੀਰ
 ਮਾਨੀ । ਧਰੇ ਬਾਨ ਪਾਨੀ
 ॥੧੫॥੯੨॥ ਮਹਾ ਰੋਸ ਗੱਜੇ ॥ ਤੁਰੀ
 ਨਾਦ ਬੱਜੇ । ਭਰੇ ਰੋਸ ਭਾਰੀ ॥ ਮਚੇ
 ਛੱਤ੍ਰ ਧਾਰੀ ॥੧੬॥੯੩॥ ਹਕੰ ਹਾਕ
 ਬੱਜੀ ॥ ਫਿਰੈ ਸੈਣ ਭੱਜੀ ॥ ਪਰਯੋ ਲੋਹ
 ਕ੍ਰੋਹੰ ॥ ਛਕੇ ਸੂਰ ਸੋਹੰ ॥੧੭॥੯੪॥
 ਗਿਰੇ ਅੰਗ ਭੰਗੰ ॥ ਦਵੰ ਜਾਨੁ ਦੰਗੰ ॥

ਕੜੰਕਾਰ ਛੁੱਟੇ ॥ ਝਣੰਕਾਰ ਉਠੇ
 ॥੧੮॥੯੫॥ ਕਟਾ ਕੱਟ ਬਾਹੈਂ ॥ ਉਭੈ
 ਜੀਤ ਚਾਹੈਂ ॥ ਮਹਾਂ ਮੱਦ ਮਾਤੇ ॥ ਤਪੇ
 ਤੇਜ ਤਾਤੇ ॥੧੯॥੯੬॥ ਰਸੰ ਰੁਦ੍ ਰਾਚੇ
 ॥ ਉਭੈ ਜੁੱਧ ਮਾਚੇ ॥ ਕਰੈਂ ਬਾਣ ਅਰਚਾ
 ॥ ਧਨੁਰ ਬੇਦ ਚਰਚਾ ॥੨੦॥੯੭॥
 ਮਚੇ ਬੀਰ ਬੀਰੰ ॥ ਉਠੀ ਝਾਰ ਤੀਰੰ ।
 ਗਲੋ ਗੱਡ ਫੋਰੈਂ ॥ ਨਹੀ ਨੈਨ ਮੋਰੈਂ
 ॥੨੧॥੯੮॥ ਸਮੁਹ ਸਸਤ੍ ਬਰਖੇ ॥
 ਮਹਿਖੁਆਸੁ ਕਰਖੇ ॥ ਕਰੈਂ ਤੀਰ ਮਾਰੰ
 ॥ ਬਹੈਂ ਲੋਹ ਧਾਰੰ ॥੨੨॥੯੯॥ ਨਦੀ

ਸ੍ਰੋਣ ਪੂਰੰ ॥ ਫਿਰੀ ਗੈਣ ਹੂਰੰ ॥ ਗਜੈ
 ਗੈਣ ਕਾਲੀ ॥ ਹਸੀ ਖੱਪਰਾਲੀ
 ॥੨੩॥੧੦੦॥ ਕਹੂੰ ਬਾਜ ਮਾਰੇ ॥ ਕਹੂੰ
 ਸੂਰ ਭਾਰੇ ॥ ਕਹੂੰ ਚਰਮ ਟੂਟੇ ॥ ਫਿਰੈਂ
 ਗੱਜ ਫੂਟੇ ॥੨੪॥੧੦੧॥ ਕਹੂੰ ਬਰਮ
 ਬੇਧੇ ॥ ਕਹੂੰ ਚਰਮ ਛੇਦੇ ॥ ਕਹੂੰ ਪੀਲ
 ਪਰਮੰ ॥ ਕਟੇ ਬਾਜ ਬਰਮੰ
 ॥੨੫॥੧੦੨॥ ਬਲੀ ਬੈਰ ਰੁੱਝੇ ॥
 ਸਮੁਹ ਸਾਰ ਝੁੱਝੇ ॥ ਲਖੇ ਬੀਰ ਖੇਤੰ ॥
 ਨਚੇ ਭੂਤ ਪ੍ਰੇਤੰ ॥੨੬॥੧੦੩॥ ਨਚੇ
 ਮਾਸਹਾਰੀ ॥ ਹਸੇ ਬਯੋਮ ਚਾਰੀ ॥

ਕਿਲਕ ਕਾਰ ਕੰਕੰ ॥ ਮਚੇ ਬੀਰ ਬੰਕੰ
 ॥੨੭॥੧੦੪॥ ਛੁਭੇ ਛੱਤ੍ਰ ਧਾਰੀ ॥
 ਮਹਿਖੁਆਸ ਚਾਰੀ । ਉਠੇ ਛਿੱਛ ਇਛੰ
 ॥ ਚਲੇ ਤੀਰ ਤਿੱਛੰ ॥੨੮॥੧੦੫॥
 ਗਣੰ ਗਾਂਧ੍ਰਬੇਅੰ ॥ ਚਰੰ ਚਾਰਣੇਯੰ । ਹਸੇ
 ਸਿੰਧ ਸਿੱਧੰ ॥ ਮਚੇ ਬੀਰ ਕੁੱਧੰ
 ॥੨੯॥੧੦੬॥ ਡਕਾ ਡੱਕ ਡਾਕੈਂ ॥
 ਹੱਕਾ ਹੱਕ ਹਾਕੈਂ ॥ ਭਕਾ ਭੁੰਕ ਭੇਰੀ ॥
 ਡਮਕ ਡਾਮ ਡੇਰੀ ॥੩੦॥੧੦੭॥ ਮਹਾ
 ਬੀਰ ਗਾਜੇ ॥ ਨਵੰ ਨਾਦ ਬਾਜੇ ॥ ਧਰਾ

ਗੋਮ ਗੱਜੇ ॥ ਦੁਗਾ ਦੈਤ ਬੱਜੇ

॥੩੧॥੧੦੮॥

ਬਿਜੇ ਛੰਦ ॥

ਜੇਤਕ ਬਾਣ ਚਲੇ ਅਰਿ ਓਰ ਤੇ
ਫੂਲ ਕੀ ਮਾਲ ਹੁਐ ਕੰਠ ਬਿਰਾਜੇ ॥
ਦਾਨਵ ਪੁੰਗਵ ਪੇਖ ਅਚੰਭਵ ਛੋਡ ਭਜੇ
ਰਣ ਏਕ ਨ ਗਾਜੇ ॥ ਕੁੰਜਰ ਪੁੰਜ ਗਿਰੇ
ਤਿਹ ਠੌਰ ਭਰੇ ਸਭ ਸ੍ਰੋਣਤ ਪੈ ਗਨ ਤਾਜੇ
॥ ਜਾਨੁਕ ਨੀਰਧ ਮੱਧ ਛਪੇ ਭ੍ਰਮਿ ਭੂ
ਧਰ ਕੇ ਭਯ ਤੇ ਨਗ ਭਾਜੇ
॥੩੨॥੧੦੯॥

ਮਨੋਹਰ ਛੰਦ ॥

ਸ੍ਰੀ ਜਗਨਾਥ ਕਮਾਨ ਲੈ ਹਾਥ
ਪਰਮਾਥਿਨ ਸੰਖ ਸ੍ਰਜਯੋ ਜਬ ਜੁੱਧੰ ॥
ਗਾਹਤ ਸੈਣ ਸੰਘਾਰਤ ਸੂਰ ਬਬੱਕਤ
ਸਿੰਘ ਭ੍ਰਮਯੋ ਰਣ ਕੁੱਧੰ ॥ ਕਉਚਹ ਭੇਦ
ਅਭੇਦਤ ਅੰਗ ਸੁਰੰਗ ਉਤੰਗ ਸੁ ਸੋਭਿਤ
ਸੁੱਧੰ ॥ ਮਾਨੋ ਬਿਸਾਲ ਬੜਵਾਨਲ
ਜੁਆਲ ਸਮੁਦ੍ਰ ਕੇ ਮੱਧ ਬਿਰਾਜਤ ਉੱਧੰ
॥੩੩॥੧੧੦॥

ਬਿਜੈ ਛੰਦ ॥

ਪੂਰ ਰਹੀ ਭਵ ਭੂਰ ਧਨੁਰ ਧੁਨਿ
ਧੂਰ ਉਡੀ ਨਭ ਮੰਡਲ ਛਾਯੋ ॥ ਨੂਰ
ਭਰੇ ਮੁਖ ਮਾਰ ਗਿਰੇ ਰਣ ਹੂਰਨ ਹੇਰ
ਹੀਯੋ ਹੁਲਸਾਯੋ ॥ ਪੂਰਨ ਰੋਸ ਭਰੇ
ਅਰਿ ਤੂਰਣ ਪੂਰਿ ਪਰੇ ਰਣ ਭੂਮਿ
ਸੁਹਾਯੋ ॥ ਚੂਰ ਭਏ ਅਰਿ ਰੂਰੇ ਗਿਰੇ
ਭਟ ਚੂਰਣ ਜਾਨਕ ਬੈਦ ਬਨਾਯੋ
॥੩੪॥੧੧੧॥

ਸੰਗੀਤ ਭੁਜੰਗ ਪ੍ਰਯਾਤ ਛੰਦ ॥

ਕਾਗੜਦੰਗ ਕਾਤੀ ਕਟਾਰੀ ਕੜਾਕੰ

॥ ਤਾਗੜਦੰਗ ਤੀਰੰ ਤੁਪੱਕੰ ਤੜਾਕੰ ॥

ਝਾਗੜਦੰਗ ਨਾਗੜਦੰਗ ਬਾਗੜਦੰਗ ਬਾਜੇ
 ॥ ਗਾਗੜਦੰਗ ਗਾਜੀ ਮਹਾ ਗੱਜ ਗਾਜੇ
 ॥੩੫॥੧੧੨॥ ਸਾਗੜਦੰਗ ਸੂਰੰ
 ਕਾਗੜਦੰਗ ਕੋਪੰ ॥ ਪਾਗੜਦੰਗ ਪਰਮੰ
 ਰਣੰ ਪਾਵ ਰੋਪੰ ॥ ਸਾਗੜਦੰਗ ਸਸਤੁੰ
 ਝਾਗੜਦੰਗ ਝਾਰੈਂ ॥ ਬਾਗੜਦੰਗ ਬੀਰੰ
 ਡਾਗੜਦੰਗ ਡਕਾਰੈਂ ॥੩੬॥੧੧੩॥
 ਚਾਗੜਦੰਗ ਚਉਪੇ ਬਾਗੜਦੰਗ ਬੀਰੰ ॥
 ਮਾਗੜਦੰਗ ਮਾਰੇ ਤਨੰ ਤਿੱਛ ਤੀਰੰ ॥
 ਗਾਗੜਦੰਗ ਗੱਜੇ ਸੁ ਬੱਜੇ ਗਹੀਰੈਂ ॥
 ਕਾਗੜਦੰਗ ਕਵੀਯਾਨ ਕਥੇ ਕਥੀਰੈਂ

॥੩੭॥੧੧੪॥ ਦਾਗੜਦੰਗ ਦਾਨੋ
 ਭਾਗੜਦੰਗ ਭਾਜੇ ॥ ਗਾਗੜਦੰਗ ਗਾਜੀ
 ਜਾਗੜਦੰਗ ਗਾਜੇ ॥ ਛਾਗੜਦੰਗ ਛਉਹੀ
 ਛੁਟੇ ਪ੍ਰੇਛੜਾਕੇ ॥ ਤਾਗੜ ਦੰਗ ਤੀਰੰ
 ਤੁਪਕੰ ਤੜਾਕੇ ॥੩੮॥੧੧੫॥
 ਗਾਗੜਦੰਗ ਗੋਮਾਯ ਗੱਜੇ ਗਹੀਰੰ ॥
 ਸਾਗੜਦੰਗ ਸੰਖੰ ਨਾਗੜ ਦੰਗ ਨਫੀਰੰ ॥
 ਬਾਗੜਦੰਗ ਬਾਜੇ ਬੱਜੇ ਬੀਰ ਖੇਤੰ ॥
 ਨਾਗੜਦੰਗ ਨਾਚੇ ਸੁ ਭੂਤੰ ਪਰੇਤੰ
 ॥੩੯॥੧੧੬॥ ਤਾਗੜਦੰਗ ਤੀਰੰ
 ਬਾਗੜਦੰਗ ਬਾਣੰ ॥ ਕਾਗੜਦੰਗ ਕਾਤੀ

ਕਟਾਰੀ ਕ੍ਰਿਪਾਣੰ ॥ ਨਾਗੜਦੰਗ ਨਾਦੰ
 ਬਾਗੜ ਦੰਗ ਬਾਜੇ ॥ ਸਾਗੜਦੰਗ ਸੂਰੰ
 ਰਾਗੜਦੰਗ ਰਾਜੇ ॥੪੦॥੧੧੭॥
 ਸਾਗੜਦੰਗ ਸੰਖੰ ਨਾਗੜਦੰਗ ਨਫੀਰੰ ॥
 ਗਾਗੜਦੰਗ ਗੋਮਾਯ ਗੱਜੇ ਗਹੀਰੰ ॥
 ਨਾਗੜਦੰਗ ਨਗਾਰੇ ਬਾਗੜਦੰਗ ਬਾਜੇ ॥
 ਜਾਗੜਦੰਗ ਜੋਧਾ ਗਾਗੜਦੰਗ ਗਾਜੇ
 ॥੪੧॥੧੧੮॥

ਨਰਾਜ ਛੰਦ ॥

ਜਿਤੇਕ ਰੂਪ ਧਾਰੀਯੰ ॥ ਤਿਤੇਕ
 ਦੇਬਿ ਮਾਰੀਯੰ ॥ ਜਿਤੇਕ ਰੂਪ ਧਾਰਹੀਂ

॥ ਤਿਤਿਓ ਦੁਗਾ ਸੰਘਾਰਹੀਂ
॥੪੨॥੧੧੯॥ ਜਿਤੇਕ ਸਸਤ੍ਰ ਵਾ ਝਰੇ
॥ ਪ੍ਰਵਾਹ ਸੋਨ ਕੇ ਪਰੇ ॥ ਜਿਤੀਕ
ਬਿੰਦੁਕਾ ਗਿਰੈਂ ॥ ਸੁ ਪਾਨ ਕਾਲਿਕਾ
ਕਰੈਂ ॥੪੩॥੧੨੦॥

ਰਸਾਵਲ ਛੰਦ ॥

ਹੂਓ ਸ੍ਰੋਣ ਹੀਨੰ ॥ ਭਯੋ ਅੰਗ ਛੀਨੰ
। ਗਿਰਿਓ ਅੰਤ ਝੁਮੰ ॥ ਮਨੋ ਮੇਘ ਭੂਮੰ
॥੪੪॥੧੨੧॥ ਸਬੈ ਦੇਵ ਹਰਖੇ ॥
ਸੁਮਨ ਧਾਰ ਬਰਖੇ । ਰਕਤ ਬਿੰਦ ਮਾਰੇ
॥ ਸਬੈ ਸੰਤ ਉਬਾਰੇ ॥੪੫॥੧੨੨॥

ਇਤਿ ਸ੍ਰੀ ਬਚਿਤ੍ਰ ਨਾਟਕੇ ਚੰਡੀ ਚਰਿਤ੍ਰੇ ਰਕਤ
ਬੀਰਜ ਬਧਹ ਚਤੁਰਥ ਧਿਆਇ ਸੰਪੂਰਣ ਮਸਤੁ

ਸੁਭ ਮਸਤੁ ॥੪॥

॥ ਅਫਜੁ ॥

ਅਥ ਨਿਸੁੰਭ ਜੁੱਧ ਕਥਨੰ ॥

ਦੋਹਰਾ ॥ ਸੁੰਭ ਨਿਸੁੰਭ ਸੁਣਯੋ ਜਬੈ

ਰਕਤ ਬੀਰਜ ਕੋ ਨਾਸ ॥ ਆਪ ਚੜ੍ਹਤ

ਭੇ ਜੋਰ ਦਲ ਸਜੇ ਪਰਸ ਅਰ ਪਾਸ

॥੧॥੧੨੩॥

ਭੁਜੰਗ ਪ੍ਰਯਾਤ ਛੰਦ ॥

ਚੜ੍ਹੇ ਸੁੰਭ ਨੈਸੁੰਭ ਸੂਰਾ ਅਪਾਰੰ ॥

ਉਠੇ ਨੱਦ ਨਾਦੰ ਸੁ ਧਉਸਾ ਧੁਕਾਰੰ ॥

ਭਈ ਅਸਟ ਸੈ ਕੋਸ ਲੋ ਛਤ੍ਰ ਛਾਯੰ ॥
 ਭਜੇ ਚੰਦ੍ਰ ਸੂਰੰ ਡਰਿਯੋ ਦੇਵ ਰਾਯੰ
 ॥੨॥੧੨੪॥ ਭਕਾ ਭੁੰਕ ਭੇਰੀ ਢਕਾ
 ਢੁੰਕ ਢੋਲੰ ॥ ਫਟੀ ਨਖ ਸਿੰਘੰ ਮੁਖੰ ਡੱਢ
 ਕੋਲੰ ॥ ਡਮਾ ਡੱਮ ਡਉਰੂ ਡਕਾ ਡੁੰਕ
 ਡੰਕੰ ॥ ਰੜੇ ਗਿੱਧ ਬਿੱਧੰ ਕਿਲੱਕਾਰ ਕੰਕੰ
 ॥੩॥੧੨੫॥ ਖੁਰੰ ਖੇਹ ਉੱਠੀ ਰਹਿਓ
 ਗੈਣ ਪੂਰੰ ॥ ਦਲੇ ਸਿੰਧ ਬਿੱਧੰ ਭਏ ਪੱਬ
 ਚੂਰੰ ॥ ਸੁਣਯੋ ਸੋਰ ਕਾਲੀ ਗਹੇ ਸਸਤ੍ਰ
 ਪਾਣੰ ॥ ਕਿਲੱਕਾਰ ਜੇਮੀ ਹਨੇ ਜੰਗ
 ਜੁਆਣੰ ॥੪॥੧੨੬॥

ਰਸਾਵਲ ਛੰਦ ॥

ਗਜੇ ਬੀਰ ਗਾਜੀ ॥ ਤੁਰੇ ਤੁੰਦ
ਤਾਜੀ ॥ ਮਹਿਖੁਆਸ ਕਰਖੇ ॥ ਸਰੰ
ਧਾਰ ਬਰਖੇ ॥੫॥੧੨੭॥ ਇਤੈ ਸਿੰਘ
ਗੱਜਿਯੋ ॥ ਮਹਾਂ ਸੰਖ ਬੱਜਿਯੋ ॥ ਰਹਿਯੋ
ਨਾਦ ਪੂਰੰ ॥ ਛੁਹੀ ਗੈਣਿ ਪੂਰੰ
॥੬॥੧੨੮॥ ਸਬੈ ਸਸਤ੍ਰ ਸਾਜੇ ॥ ਘਣੰ
ਜੇਮ ਗਾਜੇ ॥ ਚਲੇ ਤੇਜ ਤੈ ਕੈ ॥ ਅਨੰਤ
ਸਸਤ੍ਰ ਲੈ ਕੈ ॥੭॥੧੨੯॥ ਚਹੂੰ ਓਰ
ਦੂਕੇ ॥ ਮੁਖੰ ਮਾਰ ਕੂਕੇ ॥ ਅਨੰਤ ਸਸਤ੍ਰ
ਬੱਜੇ ॥ ਮਹਾਂ ਬੀਰ ਗੱਜੇ ॥੮॥੧੩੦॥

ਮੁਖੰ ਨੈਣ ਰਕਤੰ ॥ ਧਰੇ ਪਾਣ ਸਕਤੰ ।
ਕੀਏ ਕ੍ਰੋਧ ਉੱਠੇ ॥ ਸਰੰ ਬ੍ਰਿਸਟਿ ਬੁੱਠੇ
॥੯॥੧੩੧॥ ਕਿਤੇ ਦੁਸਟ ਕੂਟੇ ॥
ਅਨੰਤ ਸਸਤ੍ਰ ਛੂਟੇ ॥ ਕਰੀ ਬਾਣ ਬਰਖੰ
॥ ਭਰੀ ਦੇਬਿ ਹਰਖੰ ॥੧੦॥੧੩੨॥

ਬੇਲੀ ਬਿਦ੍ਰਮ ਛੰਦ ॥

ਕਹ ਕਹ ਸੁ ਕੂਕਤ ਕੰਕੀਯੰ । ਬਹ
ਬਹਤ ਬੀਰ ਸੁ ਬੰਕੀਯੰ ॥ ਲਹ ਲਹਤ
ਬਾਣ ਕ੍ਰਿਪਾਣਯੰ ॥ ਗਹ ਗਹਤ ਪ੍ਰੇਤ
ਮਸਾਣਯੰ ॥੧੧॥੧੩੩॥ ਡਹ ਡਹਤ
ਡਵਰ ਡਮੰਕਯੰ ॥ ਲਹ ਲਹਤ ਤੇਗ

ਤ੍ਰੰਕਯੰ ॥ ਧ੍ਰਮ ਧ੍ਰਮਤ ਸਾਂਗ ਧਮੰਕਯੰ
 ॥ ਬਬਕੰਤ ਬੀਰ ਸੁ ਬੰਕਯੰ
 ॥ ੧੨ ॥ ੧੩੪ ॥ ਛੁਟਕੰਤ ਬਾਣ ਕਮਾਣਯੰ
 ॥ ਹਹਰੰਤ ਖੇਤ ਖਤ੍ਰਾਣਯੰ ॥ ਡਹਕੰਤ
 ਡਾਮਰ ਡੰਕਣੀ ॥ ਕਹ ਕਹਕ ਕੂਕਤ
 ਜੁੱਗਣੀ ॥ ੧੩ ॥ ੧੩੫ ॥ ਉਫਟੰਤ ਸ੍ਰੋਣਤ
 ਛਿੱਛਯੰ ॥ ਬਰਖੰਤ ਸਾਇਕ ਤਿੱਛਯੰ ॥
 ਬਬਕੰਤ ਬੀਰ ਅਨੇਕਯੰ ॥ ਫਿਕਰੰਤ
 ਸਿਆਰ ਬਿਸੇਖਯੰ ॥ ੧੪ ॥ ੧੩੬ ॥
 ਹਰਖੰਤ ਸ੍ਰੋਣਤ ਰੰਗਣੀ ॥ ਬਿਹਰੰਤ
 ਦੇਬਿ ਅਭੰਗਣੀ ॥ ਬਬਕੰਤ ਕੇਹਰ

ਡੋਲਹੀਂ ॥ ਰਣ ਰੰਗ ਅਭੰਗ ਕਲੋਲਹੀਂ
॥੧੫॥੧੩੭॥ ਢਮ ਢਮਤ ਢੋਲ
ਢਮੱਕਯੰ ॥ ਢਮ ਢਮਤ ਸਾਂਗ ਢਮੱਕਯੰ
॥ ਬਹ ਬਹਤ ਕੁੱਧ ਕ੍ਰਿਪਾਣਯੰ ॥ ਜੁਝੰਤ
ਜੋਧ ਜੁਆਣਯੰ ॥੧੬॥੧੩੮॥

ਦੋਹਰਾ ॥ ਭਜੀ ਚਮੂ ਸਭ ਦਾਨਵੀ
ਸੁੰਭ ਨਿਰਖ ਨਿਜ ਨੈਣ ॥ ਨਿਕਟ
ਬਿਕਟ ਭਟ ਜੇ ਹੁਤੇ ਤਿਨ ਪ੍ਰਤਿ ਬੁਲਿਓ
ਬੈਣ ॥੧੭॥੧੩੯॥

ਨਰਾਜ ਛੰਦ ॥

ਨਿਸੁੰਭ ਸੁੰਭ ਕੋਪ ਕੈ ॥ ਪਠਿਓ ਸੁ
 ਪਾਵ ਰੋਪ ਕੈ ॥ ਕਹਿਯੋ ਕਿ ਸੀਘ੍ਰ
 ਜਾਈਯੋ ॥ ਦੁਗਾਹਿ ਬਾਂਧ ਲਿਆਈਯੋ
 ॥੧੮॥੧੪੦॥ ਚੜਿਯੋ ਸੁ ਸੈਣ ਸੱਜ ਕੈ
 ॥ ਸਕੋਪ ਸੂਰ ਗੱਜ ਕੈ ॥ ਉਠੇ ਬਜੰਤ੍ਰ
 ਬਾਜਿ ਕੈ ॥ ਚਲਿਓ ਸੁਰੇਸ ਭਾਜਿ ਕੈ
 ॥੧੯॥੧੪੧॥ ਅਨੰਤ ਸੂਰ ਸੰਗ ਲੈ ॥
 ਚਲਿਓ ਸੁ ਦੁੰਦਭੀਨ ਦੈ ॥ ਹਕਾਰ
 ਸੂਰਮਾ ਪਰੇ ॥ ਬਿਲੋਕ ਦੇਵਤਾ ਡਰੇ
 ॥੨੦॥੧੪੨॥

ਮਧੁਭਾਰ ਛੰਦ ॥

ਕੰਪਯੋ ਸੁਰੇਸ ॥ ਬੁਲਯੋ ਮਹੇਸ ॥

ਕਿਨੋ ਬਿਚਾਰ ॥ ਪੁਛੇ ਜੁਝਾਰ

॥੨੧॥੧੪੩॥ ਕੀਜੈ ਸੁ ਮਿੱਤ੍ਰ ॥

ਕਉਨੇ ਚਰਿਤ੍ਰ ॥ ਜਾ ਤੇ ਸੁ ਮਾਇ ॥

ਜੀਤੈ ਬਨਾਇ ॥੨੨॥੧੪੪॥ ਸਕਤੈਂ

ਨਿਕਾਰ ॥ ਭੇਜੋ ਅਪਾਰ ॥ ਸਤ੍ਰਨ ਜਾਇ

॥ ਹਨਿ ਹੈ ਰਿਸਾਇ ॥੨੩॥੧੪੫॥

ਸੋਈ ਕਾਮ ਕੀਨ ॥ ਦੇਵਨ ਪ੍ਰਬੀਨ ॥

ਸਕਤੈਂ ਨਿਕਾਰ ॥ ਭੇਜੀ ਅਪਾਰ

॥੨੪॥੧੪੬॥

ਬਿਰਧ ਨਰਾਜ ਛੰਦ ॥

ਚਲੀ ਸਕਤਿ ਸੀਘ੍ਰ ਸੀ ਕ੍ਰਿਪਾਣ
ਪਾਣਿ ਧਾਰ ਕੈ ॥ ਉਠੇ ਸੁ ਗ੍ਰਿਧ ਬ੍ਰਿਧ
ਡਉਰ ਡਾਕਣੀ ਡਕਾਰ ਕੈ ॥ ਹਸੇ ਸੁ
ਕੰਕ ਬੰਕਯੰ ਕਬੰਧ ਅੰਧ ਉਠਹੀ ॥
ਬਿਸੇਖ ਦੇਵਤਾਰੁ ਬੀਰ ਬਾਣ ਧਾਰ
ਬੁੱਠਹੀ ॥੨੫॥੧੪੭॥

ਰਸਾਵਲ ਛੰਦ ॥

ਸਬੈ ਸਕਤ ਐ ਕੈ ॥ ਚਲੀ ਸੀਸ
ਨਿਐ ਕੈ ॥ ਮਹਾ ਅਸਤ੍ਰ ਧਾਰੇ ॥ ਮਹਾਂ
ਬੀਰ ਮਾਰੇ ॥੨੬॥੧੪੮॥ ਮੁਖੰ ਰਕਤ
ਨੈਣੰ ॥ ਬਕੈ ਬੰਕ ਬੈਣੰ । ਧਰੇ ਅਸਤ੍ਰ

ਪਾਣੰ ॥ ਕਟਾਰੀ ਕ੍ਰਿਪਾਣੰ
 ॥੨੭॥੧੪੯॥ ਉਤੈ ਦੈਤ ਗਾਜੇ ॥
 ਤੁਰੀ ਨਾਦ ਬਾਜੇ ॥ ਧਰੇ ਚਾਰ ਚਰਮੰ ॥
 ਸ੍ਰਜੇ ਕੂਰ ਬਰਮੰ ॥੨੮॥੧੫੦॥ ਚਹੂੰ
 ਓਰ ਗਰਜੇ ॥ ਸਬੈ ਦੇਵ ਲਰਜੇ ॥ ਛੁਟੇ
 ਤਿਛ ਤੀਰੰ ॥ ਕਟੇ ਚਉਰ ਚੀਰੰ
 ॥੨੯॥੧੫੧॥ ਰਸੰ ਰੁੱਦ੍ਰ ਰੱਤੇ ॥ ਮਹਾਂ
 ਤੇਜ ਤੱਤੇ । ਕਰੀ ਬਾਣ ਬਰਖੰ ॥ ਭਰੀ
 ਦੇਬਿ ਹਰਖੰ ॥੩੦॥੧੫੨॥ ਇਤੇ ਦੇਬਿ
 ਮਾਰੈ ॥ ਉਤੈ ਸਿੰਘ ਫਾਰੈ ॥ ਗਣੰ ਗੂੜ੍ਹ
 ਗਰਜੈਂ ॥ ਸਬੈ ਦੈਤ ਲਰਜੈਂ

॥੩੧॥੧੫੩॥ ਭਈ ਬਾਣ ਬਰਖਾ ॥
ਗਏ ਜੀਤਿ ਕਰਖਾ ॥ ਸਬੈ ਦੁਸਟ ਮਾਰੇ
॥ ਮਈਯਾ ਸੰਤ ਉਬਾਰੇ ॥੩੨॥੧੫੪॥
ਨਿਸੁੰਭੰ ਸੰਘਾਰਿਓ ॥ ਦਲੰ ਦੈਤ ਮਾਰਿਯੋ
॥ ਸਬੈ ਦੁਸਟ ਭਾਜੇ । ਇਤੈ ਸਿੰਘ
ਗਾਜੇ ॥੩੩॥੧੫੫॥ ਭਈ ਪੁਹਪ
ਬਰਖਾ ॥ ਗਏ ਜੀਤਿ ਕਰਖਾ ॥ ਜਯੰ
ਸੰਤ ਜੰਪੈਂ ॥ ਤ੍ਰਸੇ ਦੈਤ ਕੰਪੈਂ
॥੩੪॥੧੫੬॥

ਇਤਿ ਸ੍ਰੀ ਬਚਿਤ੍ਰ ਨਾਟਕੇ ਚੰਡੀ ਚਰਿਤ੍ਰੇ ਨਿਸੁੰਭ
ਬਧਹ ਪੰਚਮੇਂ ਧਿਆਇ ਸੰਪੂਰਣ ਮਸਤ ਸੁਭ
ਮਸਤੁ ॥ ੫ ॥

॥ ਅਫਜੁ ॥

ਅਥ ਸੁੰਭ ਜੁੱਧ ਕਥਨੰ ॥

ਭੁਜੰਗ ਪ੍ਰਯਾਤ ਛੰਦ ॥

ਲਘੁੰ ਭ੍ਰਾਤ ਜੁੱਝਿਯੋ ਸੁਣਿਯੋ ਸੁੰਭ
ਰਾਯੰ ॥ ਸਜੇ ਸਸਤ੍ਰ ਅਸਤ੍ਰੰ ਚੜ੍ਹਿਓ
ਚਉਪ ਚਾਯੰ ॥ ਭਯੋ ਨਾਦ ਉਚੰ ਰਹਿਯੋ
ਪੂਰ ਗੈਣੰ ॥ ਤ੍ਰਸੇ ਦੇਵਤਾ ਦੈਤ ਕੰਪਯੋ
ਤ੍ਰਿਨੈਣੰ ॥੧॥੧੫੭॥ ਡਰਿਯੋ ਚਾਰ
ਬਕ੍ਤ੍ਰੰ ਟਰਿਯੋ ਦੇਵ ਰਾਜੰ ॥ ਡਿਗੇ ਪੱਬ

ਸਰਬੰ ਸ੍ਰਜੇ ਸੁਭ੍ ਸਾਜੰ ॥ ਪਰੇ ਹੂਹ ਦੈ ਕੈ
 ਭਰੇ ਲੋਹ ਕ੍ਰੋਹੰ ॥ ਮਨੋ ਮੇਰ ਕੋ ਸਾਤਵੋਂ
 ਸਿੰਗ ਸੋਹੰ ॥੨॥੧੫੮॥ ਸਜਿਯੋ ਸੈਣ
 ਸੁੰਭੰ ਕੀਯੋ ਨਾਦ ਉੱਚੰ ॥ ਸੁਣੇ
 ਗਰਭਣੀਆਨ ਕੇ ਗਰਭ ਮੁਚੰ ॥ ਪਰਿਯੋ
 ਲੋਹ ਕ੍ਰੋਹੰ ਉੱਠੀ ਸਸਤ੍ਰ ਝਾਰੰ ॥ ਚਵੀ
 ਚਾਵਡਾ ਡਾਕਣੀਯੰ ਡਕਾਰੰ
 ॥੩॥੧੫੯॥ ਬਹੇ ਸਸਤ੍ਰ ਅਸਤ੍ਰੰ ਕਟੇ
 ਚਰਮ ਬਰਮੰ ॥ ਭਲੇ ਕੈ ਨਿਬਾਹਿਯੋ ਭਟੰ
 ਸੁਆਮਿ ਧਰਮੰ ॥ ਉਠੀ ਕੂਹ ਜੂਹੰ ਗਿਰੇ
 ਚਉਰ ਚੀਰੰ ॥ ਰੁਲੇ ਤੱਛ ਮੁੱਛੰ ਪਰੀ

ਗੱਛ ਤੀਰੰ ॥੪॥੧੬੦॥ ਗਿਰੇ ਅੰਕੁਸੰ
 ਬਾਰੁਣੰ ਬੀਰ ਖੇਤੰ ॥ ਨਚੇ ਕੰਧ ਹੀਣੰ
 ਕਬੰਧੰ ਅਚੇਤੰ ॥ ਉਡੈਂ ਗਿੱਧ ਬਿੱਧੰ ਰੜੈਂ
 ਕੰਕ ਬੰਕੰ ॥ ਭਕਾ ਭੁੰਕ ਭੇਰੀ ਡਹਾ ਡੂਹ
 ਡੰਕੰ ॥੫॥੧੬੧॥ ਟਕਾ ਟੁੱਕ ਟੋਪੰ ਢਕਾ
 ਢੁੱਕ ਢਾਲੰ ॥ ਤਛਾ ਮੁੱਛ ਤੇਗੰ ਬਕੈਂ
 ਬਿੱਕਰਾਲੰ ॥ ਹਲਾ ਚਾਲ ਬੀਰੰ ਧਮਾ
 ਧੰਮਿ ਸਾਗੰ ॥ ਪਰੀ ਹਾਲ ਹੂਲੰ ਸੁਣਿਓ
 ਲੋਗ ਨਾਗੰ ॥੬॥੧੬੨॥ ਡਕੀ ਡਾਕਣੀ
 ਜੋਗਣੀਯੰ ਬਿਤਾਲੰ ॥ ਨਚੇ ਕੰਧ ਹੀਣੰ
 ਕਬੰਧੰ ਕਪਾਲੰ ॥ ਹਸੇ ਦੇਵ ਸਰਬੰ

ਰਿਸਯੋ ਦਾਨਵੇਸੰ ॥ ਕਿਧੋ ਅਗਨਿ
ਜੁਆਲੰ ਭਯੋ ਆਪ ਭੇਸੰ ॥੨॥੧੬੩॥

ਦੋਹਰਾ ॥ ਸੁੰਭਾਸੁਰ ਜੇਤਕ ਅਸੁਰ
ਪਠਏ ਕੋਪ ਬਢਾਇ ॥ ਤੇ ਦੇਬੀ ਸੋਖਿਤ
ਕਰੇ ਬੁੰਦ ਤਵਾ ਕੀ ਨਿਆਇ
॥੮॥੧੬੪॥

ਨਰਾਜ ਛੰਦ ॥

ਸੁ ਬੀਰ ਸੈਣ ਸੱਜਿਕੈ ॥ ਚੜਯੋ
ਸਕੋਪ ਗੱਜਿਕੈ ॥ ਚਲਿਯੋ ਸੁ ਸਸਤ੍ਰ
ਧਾਰਕੈ ॥ ਪੁਕਾਰ ਮਾਰ ਮਾਰਕੈ
॥੯॥੧੬੫॥

ਸੰਗੀਤ ਮਧੁਭਾਰ ਛੰਦ ॥

ਕਾਗੜਦੰ ਕੜਾਕ । ਤਾਗੜਦੰ

ਤੜਾਕ ॥ ਸਾਗੜਦੰ ਸੁ ਬੀਰ ।

ਗਾਗੜਦੰ ਗਹੀਰ ॥੧੦॥੧੬੬॥

ਨਾਗੜਦੰ ਨਿਸਾਣ ॥ ਜਾਗੜਦੰ ਜੁਆਣ

॥ ਨਾਗੜਦੀ ਨਿਹੰਗ ॥ ਪਾਗੜਦੀ

ਪਿਲੰਗ ॥੧੧॥੧੬੭॥ ਤਾਗੜਦੀ

ਤਮੱਕਿ । ਲਾਗੜਦੀ ਲਹੱਕਿ ॥

ਕਾਗੜਦੰ ਕ੍ਰਿਪਾਣ ॥ ਬਾਹੈਂ ਜੁਆਣ

॥੧੨॥੧੬੮॥ ਖਾਗੜਦੀ ਖਤੰਗ ॥

ਨਾਗੜਦੀ ਨਿਹੰਗ ॥ ਛਾਗੜਦੀ ਛੁਟੰਤ ॥

ਆਗੜਦੀ ਉਡੰਤ ॥੧੩॥੧੬੯॥
ਪਾਗੜਦੀ ਪਵੰਗ ॥ ਸਾਗੜਦੀ ਸੁਭੰਗ
॥ ਜਾਗੜਦੀ ਜੁਆਣ ॥ ਝਾਗੜਦੀ
ਝੁਝਾਣ ॥੧੪॥੧੭੦॥ ਝਾਗੜਦੀ
ਝਤੰਗ ॥ ਕਾਗੜਦੀ ਕੜੰਗ ॥
ਤਾਗੜਦੀ ਤੜਾਕ ॥ ਚਾਗੜਦੀ ਚਟਾਕ
॥੧੫॥੧੭੧॥ ਘਾਗੜਦੀ ਘਬਾਕ ॥
ਭਾਗੜਦੀ ਭਭਾਕ ॥ ਕਾਗੜਦੀ ਕਪਾਲਿ
॥ ਨੱਚੀ ਬਿਕ੍ਕਾਲ ॥੧੬॥੧੭੨॥
ਨਰਾਜ ਛੰਦ ॥

ਅਨੰਤ ਦੁਸਟ ਮਾਰਯੰ ॥ ਬਿਅੰਤ

ਸੋਕ ਟਾਰਯੰ ॥ ਕਮੰਧ ਅੰਧ ਉਠੀਯੰ ॥

ਬਿਸੇਖ ਬਾਣ ਬੁਠੀਯੰ ॥੧੭॥੧੭੩॥

ਕੜਾਕ ਕਰਮੁਕੰ ਉਧੰ ॥ ਸੜਾਕ ਸੈਹਥੀ

ਜੁਧੰ ॥ ਬਿਅੰਤ ਬਾਣ ਬਰਖਯੰ ॥ ਬਿਸੇਖ

ਬੀਰ ਹਰਖਯੰ ॥੧੮॥੧੭੪॥

ਸੰਗੀਤ ਨਰਾਜ ਛੰਦ ॥

ਕੜਾ ਕੜੀ ਕ੍ਰਿਪਾਣਯੰ ॥ ਜਟਾ

ਜੁਟੀ ਜੁਆਣਯੰ ॥ ਸੁ ਬੀਰ ਜਾਗੜਦੰ

ਜਗੇ ॥ ਲੜਾਕ ਲਾਗੜਦੰ ਪਗੇ

॥੧੯॥੧੭੫॥

ਰਸਾਵਲ ਛੰਦ ॥

ਝਮੀ ਤੇਗ ਝੱਟੰ ॥ ਛੁਰੀ ਛਿੱਪੁ ਛੁੱਟੰ

॥ ਗੁਰੰ ਗੁਰਜ ਗੱਟੰ ॥ ਪਲੰਗੰ ਪਿਸੱਟੰ

॥੨੦॥੧੭੬॥ ਕਿਤੇ ਸ੍ਰੋਣ ਚੱਟੰ ॥

ਕਿਤੇ ਸੀਸ ਫੁਟੰ ॥ ਕਹੂੰ ਹੂਹ ਛੁਟੰ ॥

ਕਹੂੰ ਬੀਰ ਉੱਠੰ ॥੨੧॥੧੭੭॥ ਕਹੂੰ

ਧੂਰਿ ਲੁਟੰ ॥ ਕਿਤੇ ਮਾਰ ਰੱਟੰ ਭਣੈ ਜੱਸ

ਭੱਟੰ ॥ ਕਿਤੇ ਪੇਟ ਫੱਟੰ ॥੨੨॥੧੭੮॥

ਭਜੇ ਛਤ੍ਰਿ ਥਟੰ ॥ ਕਿਤੇ ਖੂਨ ਖੱਟੰ ॥

ਕਿਤੇ ਦੁਸਟ ਦੱਟੰ ॥ ਫਿਰੇ ਜਿਯੋਂ ਹਰੱਟੰ

॥੨੩॥੧੭੯॥ ਸਜੇ ਸੂਰ ਸਾਰੇ ॥

ਮਹਿਖੁਆਸ ਧਾਰੇ ॥ ਲਏ ਖੱਗ ਆਰੇ ॥
 ਮਹਾ ਰੋਹ ਵਾਰੇ ॥੨੪॥੧੮੦॥ ਸਹੀ
 ਰੂਪ ਕਾਰੇ ॥ ਮਨੋ ਸਿੰਧ ਖਾਰੇ ॥ ਕਈ
 ਬਾਰ ਗਾਰੇ ॥ ਸੁ ਮਾਰੰ ਉਚਾਰੇ
 ॥੨੫॥੧੮੧॥ ਭਵਾਨੀ ਪਛਾਰੇ ॥ ਜਵਾ
 ਜੇਮਿ ਜਾਰੇ ॥ ਬਡੇ ਈ ਲੁਝਾਰੇ ॥ ਹੁਤੇ
 ਜੇ ਹੀਏ ਵਾਰੇ ॥੨੬॥੧੮੨॥ ਇਕੰ
 ਬਾਰ ਟਾਰੇ ॥ ਠਮੰ ਠੋਕ ਠਾਰੇ ॥ ਬਲੀ
 ਮਾਰ ਡਾਰੇ ॥ ਢਮੱਕੇ ਢਢਾਰੇ ॥
 ੨੭॥੧੮੩॥ ਬਹੇ ਬਾਣਣਿਆਰੇ ॥
 ਕਿਤੇ ਤੀਰ ਤਾਰੇ ॥ ਲਖੇ ਹਾਥ ਬਾਰੇ ॥

ਦਿਵਾਨੇ ਦਿਦਾਰੇ ॥੨੮॥੧੮੪॥ ਹਣੇ
ਭੂਮਿ ਪਾਰੇ ॥ ਕਿਤੇ ਸਿੰਘ ਫਾਰੇ ॥
ਕਿਤੇ ਆਪ ਬਾਰੇ ॥ ਜਿਤੇ ਦੈਤ ਭਾਰੇ
॥੨੯॥੧੮੫॥ ਤਿਤੇ ਅੰਤ ਹਾਰੇ ॥
ਬਡੇ ਈ ਅੜਿਆਰੇ ॥ ਖਰੇ ਈ
ਬਰਿਆਰੇ ॥ ਕਰੂਰੰ ਕਰਾਰੇ
॥੩੦॥੧੮੬॥ ਲਖੱਕੇ ਲਲਾਰੇ ॥
ਅਰੀਲੇ ਅਰਿਆਰੇ ॥ ਹਣੇ ਕਾਲਿ ਕਾਰੇ
॥ ਭੱਜੇ ਰੋਹ ਵਾਰੇ ॥੩੧॥੧੮੭॥

ਦੋਹਰਾ ॥ ਇਹ ਬਿਧਿ ਦੁਸਟ
ਪ੍ਰਜਾਰਕੈ ਸਸਤ੍ਰ ਅਸਤ੍ਰ ਕਰ ਲੀਨ ॥

ਬਾਣ ਬੁੰਦ ਪ੍ਰਿਥਮੇ ਬਰਖ ਸਿੰਘ ਨਾਦ
ਪੁਨ ਕੀਨ ॥੩੨॥੧੮੮॥

ਰਸਾਵਲ ਛੰਦ ॥

ਸਣਿਯੋ ਸੁੰਭ ਰਾਯੰ ॥ ਚੜ੍ਹਯੋ ਚਉਪ
ਚਾਯੰ ॥ ਸਜੇ ਸਸਤ੍ਰ ਪਾਣੰ । ਚੜ੍ਹੇ ਜੰਗ
ਜੁਆਣੰ ॥੩੩॥੧੮੯॥ ਲਗੇ ਢੋਲ ਢੰਕੇ
॥ ਕਮਾਣੰ ਕੜੰਕੇ ॥ ਭਏ ਨੱਦ ਨਾਦੰ ॥
ਧੁਣੰ ਨਿਰ ਬਿਖਾਦੰ ॥੩੪॥੧੯੦॥
ਚਮੱਕੀ ਕ੍ਰਿਪਾਣੰ ॥ ਹਠੇ ਤੇਜ ਮਾਣੰ ॥
ਮਹਾਂ ਬੀਰ ਹੁੰਕੇ ॥ ਸੁ ਨੀਸਾਣ ਦੁੰਕੇ
॥੩੫॥੧੯੧॥ ਚਹੂੰ ਓਰ ਗਰਜੇ ॥ ਸਬੈ

ਦੇਵ ਲਰਜੇ ॥ ਸਰੰ ਧਾਰ ਬਰਖੇ ॥ ਮਯਾ
ਪਾਣ ਪਰਖੇ ॥੩੬॥੧੯੨॥

ਚੌਪਈ ॥ ਜੇ ਲਏ ਸਸਤ੍ਰ ਸਾਮੁਹੇ
ਧਏ ॥ ਤਿਤੇ ਨਿਧਨ ਕਹੁੰ ਪ੍ਰਾਪਤ ਭਏ
॥ ਝਮਕਤ ਭਈ ਅਸਿਨ ਕੀ ਧਾਰਾ ॥
ਭਭਕੇ ਰੁੰਡ ਮੁੰਡ ਬਿਕਰਾਰਾ
॥੩੭॥੧੯੩॥

ਦੋਹਰਾ ॥ ਹੈ ਗੈ ਰਥ ਪੈਦਲ ਕਟੇ
ਬਚਯੋ ਨ ਜੀਵਤ ਕੋਇ ॥ ਤਬ ਆਪੈ
ਨਿਕਸਯੋ ਨ੍ਰਿਪਤਿ ਸੁੰਭ ਕਰੈ ਸੋ ਹੋਇ
॥੩੮॥੧੯੪॥

ਚੌਪਈ ॥

ਸਿਵ ਦੂਤੀ ਇਕ ਦੁਰਗਾ ਬੁਲਾਈ

॥ ਕਾਨ ਲਾਗ ਨੀਕੈ ਸਮਝਾਈ ॥ ਸਿਵ

ਕੋ ਭੇਜ ਦੀਜੀਐ ਤਹਾਂ ॥ ਦੈਤ ਰਾਜ

ਇਸਥਿਤ ਹੈ ਜਹਾਂ ॥੩੯॥੧੯੫॥

ਸਿਵਦੂਤੀ ਜਬ ਇਮ ਸੁਨ ਪਾਵਾ ॥

ਸਿਵਹਿ ਦੂਤ ਕਰ ਉਤੈ ਪਠਾਵਾ ॥ ਸਿਵ

ਦੂਤੀ ਤਾ ਤੇ ਭਯੋ ਨਾਮਾ ॥ ਜਾਨਤ

ਸਕਲ ਪੁਰਖ ਅਰ ਬਾਮਾ

॥੪੦॥੧੯੬॥ ਸਿਵ ਕਹੀ ਦੈਤ ਰਾਜ

ਸੁਨਿ ਬਾਤਾ ॥ ਇਹ ਬਿਧਿ ਕਹਿਯੋ

ਤੁਮਹੁ ਜਗ ਮਾਤਾ ॥ ਦੇਵਨ ਕੌ ਦੈ ਕੈ
ਠਕੁਰਾਈ ॥ ਕੈ ਮਾਂਡਹੁ ਹਮ ਸੰਗ
ਲਰਾਈ ॥੪੧॥੧੯੭॥ ਦੈਤ ਰਾਜ ਇਹ
ਬਾਤ ਨ ਮਾਨੀ ॥ ਆਪ ਚਲੇ ਜੂਝਨ
ਅਭਿਮਾਨੀ ॥ ਗਰਜਤ ਕਾਲਿ ਕਾਲ
ਜਯੋਂ ਜਹਾਂ ॥ ਪ੍ਰਾਪਤ ਭਯੋ ਅਸੁਰ ਪਤਿ
ਤਹਾਂ ॥੪੨॥੧੯੮॥ ਚਮਕੀ ਤਹਾਂ
ਅਸਿਨ ਕੀ ਧਾਰਾ ॥ ਨਾਚੇ ਭੂਤ ਪ੍ਰੇਤ
ਬੈਤਾਰਾ ॥ ਫਰਕੇ ਅੰਧ ਕਬੰਧ ਅਚੇਤਾ
॥ ਭਿਭਰੇ ਭਈਰਵ ਭੀਮ ਅਨੇਕਾ
॥੪੩॥੧੯੯॥ ਤੁਰਹੀ ਢੋਲ ਨਗਾਰੇ

ਬਾਜੇ ॥ ਭਾਂਤ ਭਾਂਤ ਜੋਧਾ ਰਣ ਗਾਜੇ ॥
ਢਢਿ ਡਢ ਡਮਰੁ ਡੁਗ ਡੁਗੀ ਘਨੀ ॥
ਨਾਇ ਨਫੀਰੀ ਜਾਤ ਨ ਗਨੀ
॥੪੪॥੨੦੦॥

ਮਧੁਭਾਰ ਛੰਦ ॥

ਹੁੰਕੇ ਕਿਕਾਣ ॥ ਧੁੰਕੇ ਨਿਸਾਣ ॥

ਸੱਜੇ ਸੁ ਬੀਰ ॥ ਗੱਜੇ ਗਹੀਰ
॥੪੫॥੨੦੧॥ ਝੁੱਕੇ ਨਿਝੱਕ ॥ ਬੱਜੇ
ਉਬੱਕ ॥ ਸੱਜੇ ਸੁਬਾਹ ॥ ਅਛੈ ਉਛਾਹ
॥੪੬॥੨੦੨॥ ਕੱਟੇ ਕਿਕਾਣ ॥ ਫੁੱਟੇ
ਚਵਾਣ ॥ ਸੂਲੰ ਸੜਾਕ ॥ ਉੱਠੇ ਕੜਾਕ

॥੪੭॥੨੦੩॥ ਗੱਜੇ ਜੁਆਣ ॥ ਬੱਜੇ
ਨਿਸਾਣਿ ॥ ਸੱਜੇ ਰਜੇਂਦ੍ਰ ॥ ਗੱਜੇ ਗਜੇਂਦ੍ਰ
॥੪੮॥੨੦੪॥

ਭੁਜੰਗ ਪ੍ਰਯਾਤ ਛੰਦ ॥

ਫਿਰੇ ਬਾਜੀਯੰ ਤਾਜੀਯੰ ਇੱਤ ਉੱਤੰ

॥ ਗਜੇ ਬਾਰੁਣੰ ਦਾਰੁਣੰ ਰਾਜ ਪੁਤ੍ਰੰ ॥
ਬਜੇ ਸੰਖ ਭੇਰੀ ਉਠੇ ਸੰਖ ਨਾਦੰ ॥
ਰਣਕੈ ਨਫੀਰੀ ਧੁਣੰ ਨਿਰ ਬਿਖਾਦੰ
॥੪੯॥੨੦੫॥ ਕਤੱਕੇ ਕ੍ਰਿਪਾਣੰ
ਸਤੱਕਾਰ ਸੇਲੰ ॥ ਉਠੀ ਕੂਹ ਜੂਹੰ ਭਈ
ਰੇਲ ਪੇਲੰ ॥ ਰੁਲੇ ਤੱਛ ਮੁੱਛੰ ਗਿਰੇ ਚਉਰ

ਚੀਰੰ ॥ ਕਹੂੰ ਹੱਥ ਮਥੰ ਕਹੂੰ ਬਰਮ ਬੀਰੰ
॥੫੦॥੨੦੬॥

ਰਸਾਵਲ ਛੰਦ ॥

ਬਲੀ ਬੈਰ ਰੁੱਝੇ ॥ ਸਮੁਹ ਸਾਰ ਜੁੱਝੇ
॥ ਸੰਭਾਰੇ ਹਥਿਆਰੰ ॥ ਬਕੇ ਮਾਰ ਮਾਰੰ
॥੫੧॥੨੦੭॥ ਸਬੈ ਸਸਤ੍ਰੁ ਸੱਜੇ ॥
ਮਹਾ ਬੀਰ ਗੱਜੇ ॥ ਸਰੰ ਓਘ ਛੁੱਟੇ ॥
ਕੜੱਕਾਰ ਉੱਠੇ ॥੫੨॥੨੦੮॥ ਬਜੈ
ਬਾਦ੍ਰੁਤੇਅੰ ॥ ਹਸੈਂ ਗਾਂਧ੍ਰੁਬੇਅੰ ॥ ਝੰਡਾ
ਗੱਡ ਜੁੱਟੇ ਸਰੰ ਸੰਜ ਛੁੱਟੇ
॥੫੩॥੨੦੯॥ ਚਹੂੰ ਓਰ ਉੱਠੇ ॥ ਸਰੰ

ਬ੍ਰਿਸਟਿ ਬੁੱਠੇ ॥ ਕਰੋਧੀ ਕਰਾਲੰ ॥ ਬਕੈ
ਬਿਕਰਾਲੰ ॥੫੪॥੨੧੦॥

ਭੁਜੰਗ ਪ੍ਰਯਾਤ ਛੰਦ ॥

ਕਿਤੇ ਕੁਠੀਯੰ ਬੁਠੀਯੰ ਬ੍ਰਿਸਟ ਬਾਣੰ
॥ ਰਣੰ ਡੁਲੀਯੰ ਬਾਜ ਖਾਲੀ ਪਲਾਣੰ ॥
ਜੁਝੇ ਜੋਧਯੰ ਬੀਰ ਦੇਵੰ ਅਦੇਵੰ ॥ ਸੁਭੇ
ਸਸਤ੍ਰ ਸਾਜਾ ਮਨੋ ਸਾਂਤਨੇਵੰ
॥੫੫॥੨੧੧॥ ਗਜੇ ਗੱਜੀਯੰ ਸਰਬ ਸੱਜੇ
ਪਵੰਗੰ ॥ ਜੁੱਧੰ ਜੁੱਟੀਅੰ ਜੋਧ ਛੁੱਟੇ ਖਤੰਗੰ
॥ ਤੜਕੇ ਤਬਲੰ ਝੜਕੇ ਕ੍ਰਿਪਾਣੰ ॥
ਸੜਕਾਰ ਸੇਲੰ ਰਣਕੇ ਨਿਸਾਣੰ

॥੫੬॥੨੧੨॥ ਢਮਾ ਢੱਮ ਢੋਲੰ ਢਲਾ
 ਢੁੱਕ ਢਾਲੰ ॥ ਗਹਾ ਜੂਹ ਗੱਜੇ ਹਯੰ ਹਾਲ
 ਢਾਲੰ ॥ ਸਟਾ ਸੱਟ ਸੇਲੰ ਖਹਾ ਖੂਨਿ
 ਖੱਗੰ ॥ ਤੁੱਟੇ ਢਰਮ ਬਰਮੰ ਉਠੇ ਨਾਲ
 ਅੱਗੰ ॥੫੭॥੨੧੩॥ ਉਠੇ ਅੱਗਿ ਨਾਲੰ
 ਖਹੇ ਖੋਲ ਖੱਗੰ ॥ ਨਿਸਾ ਮਾਵਸੀ ਜਾਣੁ
 ਮਾਸਾਣ ਜੱਗੰ ॥ ਡਕੀ ਡਾਕਣੀ ਡਾਮਰੂ
 ਡਉਰ ਡੱਕੰ ॥ ਨਚੇ ਬੀਰ ਬੈਤਾਲ ਭੂਤੰ
 ਭਭੱਕੰ ॥੫੮॥੨੧੪॥

ਬੇਲੀ ਬਿੰਦ੍ਰਮ ਛੰਦ ॥

ਸਰਬਾਸਤ੍ਰ ਆਵਤ ਭੇ ਜਿਤੇ ॥ ਸਭ
 ਕਾਟਿ ਦੀਨ ਦੁਰਗਾ ਤਿਤੇ ॥ ਅਰਿ ਔਰ
 ਜੇਤਕ ਡਾਰੀਅੰ ॥ ਤੇਉ ਕਾਟਿ ਭੂਮਿ
 ਉਤਾਰੀਅੰ ॥੫੯॥੨੧੫॥ ਸਰ ਆਪ
 ਕਾਲੀ ਛੰਡੀਅੰ ॥ ਸਰਬਾਸਤ੍ਰ ਸਸੱਤੁ
 ਬਿਹੰਡੀਅੰ ॥ ਸਸਤ੍ਰ ਹੀਨ ਜਬੈ
 ਨਿਹਾਰਿਓ ॥ ਜੈ ਸਬਦ ਦੇਵਨ
 ਉਚਾਰਿਓ ॥੬੦॥੨੧੬॥ ਨਭ ਮੱਧਿ
 ਬਾਜਨ ਬਾਜਹੀਂ ॥ ਅਵਿਲੋਕ ਦੇਵ ਸੁ
 ਗਾਜਹੀਂ ਲਖਿ ਦੇਵ ਬਾਰੰ ਬਾਰਹੀਂ ॥ ਜੈ
 ਸਬਦ ਸਰਬ ਪੁਕਾਰਹੀਂ ॥੬੧॥੨੧੭॥

ਰਣ ਕੋਪ ਕਾਲ ਕਰਾਲੀਯੰ ॥ ਖਟ ਅੰਗ
ਪਾਣਿ ਉਛਾਲੀਯੰ ॥ ਸਿਰ ਸੁੰਭ ਹੱਥ
ਦੁਛੰਡੀਯੰ ॥ ਇਕ ਚੋਟ ਦੁਸਟ ਬਿਹੰਡੀਯੰ
॥੬੨॥੨੧੮॥

ਦੋਹਰਾ ॥ ਜਿਮ ਸੁੰਭਾਸੁਰ ਕੋ ਹਨਾ
ਅਧਿਕ ਕੋਪ ਕੈ ਕਾਲ ॥ ਤਯੋਂ ਸਾਧਨ
ਕੇ ਸਤ੍ਰੁ ਸਭ ਚਾਬਤ ਜਾਹਿ ਕਰਾਲ
॥੬੩॥੨੧੯॥

ਇਤਿ ਸ੍ਰੀ ਬਚਿਤ੍ਰ ਨਾਟਕੇ ਚੰਡੀ ਚਰਿਤ੍ਰੇ ਸੁੰਭ
ਬਧਹ ਖਸਟਮੋਂ ਧਿਆਇ ਸੰਪੂਰਣੰ ਮਸਤੁ ਸੁਭ
ਮੁਸਤੁ ॥੫॥

॥ ਅਫਜੂ ॥

ਅਥ ਜੈਕਾਰ ਸਬਦ ਕਥਨੰ ॥

ਬੇਲੀ ਬਿਦਮ ਛੰਦ ॥

ਜੈ ਸਬਦ ਦੇਵ ਪੁਕਾਰਹੀਂ ॥ ਸਭ

ਫੂਲ ਫੂਲਨ ਡਾਰਹੀਂ ॥ ਘਨ ਸਾਰ

ਕੁੰਕਮ ਲਿਆਇਕੈ ॥ ਟੀਕਾ ਦੀਯੋ

ਹਰਖਾਇਕੈ ॥੧॥੨੨੦॥

ਚੌਪਈ ॥ ਉਸਤਤ ਸਬਹੂੰ ਕਰੀ

ਅਪਾਰਾ ॥ ਬ੍ਰਹਮ ਕਵਚ ਕੋ ਜਾਪ

ਉਚਾਰਾ ॥ ਸੰਤ ਸੰਬੂਹ ਪ੍ਰਫੁੱਲਤ ਭਏ ॥

ਦੁਸਟ ਅਰਿਸਟ ਨਾਸ ਹੁਐ ਗਏ

॥੨॥੨੨੧॥ ਸਾਧਨ ਕੋ ਸੁਖ ਬਢੇ

ਅਨੇਕਾ ॥ ਦਾਨਵ ਦੁਸਟ ਨ ਬਾਚਾ
ਏਕਾ ॥ ਸੰਤ ਸਹਾਇ ਸਦਾ ਜਗ ਮਾਈ
॥ ਜਹ ਤਹ ਸਾਧਨ ਹੋਹਿ ਸਹਾਈ
॥੩॥੨੨੨॥

ਦੇਵੀ ਜੂ ਕੀ ਉਸਤਤ ॥

ਭੁਜੰਗ ਪ੍ਰਯਾਤ ਛੰਦ ॥

ਨਮੋ ਜੋਗ ਜ੍ਵਾਲੰ ਧਰੀਅੰ ਜੁਆਲੰ ॥

ਨਮੋ ਸੁੰਭ ਹੰਤੀ ਨਮੋ ਕੂਰ ਕਾਲੰ ॥ ਨਮੋ

ਸ੍ਰੋਣ ਬੀਰਜਾਰਦਨੀ ਧੂਮ੍ ਹੰਤੀ ॥ ਨਮੋ

ਕਾਲਕਾ ਰੂਪ ਜ੍ਵਾਲਾ ਜਯੰਤੀ

॥੪॥੨੨੩॥ ਨਮੋ ਅੰਬਕਾ ਜੰਬਹਾ ਜੋਤਿ

ਰੂਪਾ ॥ ਨਮੋ ਚੰਡ ਮੁੰਡਾਰਦਨੀ ਭੂਪਿ
 ਭੂਪਾ ॥ ਨਮੋ ਚਾਮਰੰ ਚੀਰਣੀ ਚਿਤ੍ਰ ਰੂਪੰ
 ॥ ਨਮੋ ਪਰਮ ਪ੍ਰਗਯਾ ਬਿਰਾਜੈ ਅਨੂਪੰ
 ॥੫॥੨੨੪॥ ਨਮੋ ਪਰਮ ਰੂਪਾ ਨਮੋ
 ਕੂਰ ਕਰਮਾ ॥ ਨਮੋ ਰਾਜਸਾ ਸਾਤਕਾ
 ਪਰਮ ਬਰਮਾ ॥ ਨਮੋ ਮਹਿਖ ਦਈਤ ਕੋ
 ਅੰਤ ਕਰਣੀ ॥ ਨਮੋ ਤੋਖਣੀ ਸੋਖਣੀ
 ਸਰਬ ਇਰਣੀ ॥੬॥੨੨੫॥ ਬਿੜਾ
 ਲੱਛ ਹੰਤੀ ਕੂਰਾਛ ਘਾਯਾ । ਦਿਜਗਿ
 ਦਯਾਰਦਨੀਅੰ ਨਮੋ ਜੋਗ ਮਾਯਾ ॥ ਨਮੋ
 ਭਈਰਵੀ ਭਾਰਗਵੀਅੰ ਭਵਾਨੀ ॥ ਨਮੋ

ਜੋਗ ਜੁਲੰਧਰੀ ਸਰਬ ਮਾਨੀ
 ॥੭॥੨੨੬॥ ਅਧੀ ਉਰਧਵੀ ਆਪ
 ਰੂਪਾ ਅਪਾਰੀ ॥ ਰਮਾ ਰਸਟਰੀ ਕਾਮ
 ਰੂਪਾ ਕੁਮਾਰੀ ॥ ਭਵੀ ਭਾਵਨੀ
 ਭਈਰਵੀ ਭੀਮ ਰੂਪਾ ॥ ਨਮੋ ਹਿੰਗੁਲਾ
 ਪਿੰਗੁਲਾਯੰ ਅਨੂਪਾ ॥੮॥੨੨੭॥ ਨਮੋ
 ਜੁੱਧਨੀ ਕੁੱਧਨੀ ਕੂਰ ਕਰਮਾ ॥ ਮਹਾਂ
 ਬੁੱਧਨੀ ਸਿੱਧਨੀ ਸੁਧ ਕਰਮਾ ॥ ਪਰੀ
 ਪਦਮਨੀ ਪਾਰਬਤੀ ਪਰਮ ਰੂਪਾ ॥
 ਸਿਵੀ ਬਾਸਵੀ ਬ੍ਰਾਹਮੀ ਰਿੱਧ ਕੂਪਾ
 ॥੯॥੨੨੮॥ ਮ੍ਰਿੜਾ ਮਾਰਜਨੀ

ਸੂਰਤਵੀ ਮੋਹ ਕਰਤਾ ॥ ਪਰਾ
 ਪਉਸਟਣੀ ਪਾਰਬਤੀ ਦੁਸਟ ਹਰਤਾ ॥
 ਨਮੋ ਹਿੰਗੁਲਾ ਪਿੰਗੁਲਾ ਤੋਤਲਾਯੰ ॥ ਨਮੋ
 ਕਾਰਤਿਕਯਾਨੀ ਸਿਵਾ ਸੀਤਲਾਯੰ
 ॥੧੦॥੨੨੯॥ ਭਵੀ ਭਾਰਗਵੀਅੰ ਨਮੋ
 ਸਸਤ੍ਰ ਪਾਣੰ ॥ ਨਮੋ ਅਸਤ੍ਰ ਧਰਤਾ ਨਮੋ
 ਤੇਜ ਮਾਣੰ ॥ ਜਯਾ ਆਜਯਾ ਚਰਮਣੀ
 ਚਾਵਡਾਯੰ ॥ ਕ੍ਰਿਪਾ ਕਾਲਕਾਯੰ ਨਯੰ
 ਨਿਤਿ ਨਿਆਯੰ ॥੧੧॥੨੩੦॥ ਨਮੋ
 ਚਾਪਣੀ ਚਰਮਣੀ ਖੜਗਪਾਣੰ ॥ ਗਦਾ
 ਪਾਣਿਣੀ ਚੱਕ੍ਰਣੀ ਚਿੱਤ੍ਰ ਮਾਣੰ ॥ ਨਮੋ

ਸੂਲਣੀ ਸੈਹਥੀ ਪਾਣਿ ਮਾਤਾ ॥ ਨਮੋ
 ਗਿਆਨ ਬਿਗਿਆਨ ਕੀ ਗਿਆਨ
 ਗਿਆਤਾ ॥੧੨॥੨੩੧॥ ਨਮੋ ਪੋਖਣੀ
 ਸੋਖਣੀਅੰ ਮ੍ਰਿਤਾਲੀ ॥ ਨਮੋ ਦੁਸਟ
 ਦੋਖਾਰਦਨੀ ਰੂਪ ਕਾਲੀ ॥ ਨਮੋ ਜੋਗ
 ਜੁਆਲਾ ਨਮੋ ਕਾਰਤਿਕਯਾਨੀ ॥ ਨਮੋ
 ਅੰਬਕਾ ਤੋਤਲਾ ਸ੍ਰੀ ਭਵਾਨੀ
 ॥੧੩॥੨੩੨॥ ਨਮੋ ਦੋਖ ਦਾਹੀ ਨਮੋ
 ਦੁਖਯ ਹਰਤਾ ॥ ਨਮੋ ਸਸਤ੍ਰਣੀ
 ਅਸਤ੍ਰਣੀ ਕਰਮ ਕਰਤਾ ॥ ਨਮੋ
 ਰਿਸਟਣੀ ਪੁਸਟਣੀ ਪਰਮ ਜੁਆਲਾ ॥

ਨਮੋ ਤਾਰੁਣੀਯੰ ਨਮੋ ਬ੍ਰਿਧ ਬਾਲਾ
 ॥੧੪॥੨੩੩॥ ਨਮੋ ਸਿੰਘ ਬਾਹੀ ਨਮੋ
 ਦਾੜ੍ਹ ਗਾੜ੍ਹੰ ॥ ਨਮੋ ਖੱਗ ਦੱਗੰ ਝਮਾ ਝਮ
 ਬਾੜ੍ਹੰ ॥ ਨਮੋ ਰੂੜ੍ਹ ਗੂੜ੍ਹੰ ਨਮੋ ਸਰਬ
 ਬਿਆਪੀ ॥ ਨਮੋ ਨਿੱਤ ਨਾਰਾਯਣੀ
 ਦੁਸਟ ਖਾਪੀ ॥੧੫॥੨੩੪॥ ਨਮੋ
 ਰਿੱਧਿ ਰੂਪੰ ਨਮੋ ਸਿੱਧ ਕਰਣੀ ॥ ਨਮੋ
 ਪੋਖਣੀ ਸੋਖਣੀ ਸਰਬ ਭਰਣੀ ॥ ਨਮੋ
 ਆਰਜਨੀ ਮਾਰਜਨੀ ਕਾਲ ਰਾੜ੍ਹੀ ॥
 ਨਮੋ ਜੋਗ ਜੁਲੰਧਰੀ ਸਰਬ ਦਾੜ੍ਹੀ
 ॥੧੬॥੨੩੫॥ ਨਮੋ ਪਰਮ ਪਰਮੇਸੁਰੀ

ਧਰਮ ਕਰਣੀ ॥ ਨਮੋ ਨਿੱਤ ਨਾਰਾਇਣੀ
 ਦੁਸਟ ਦਰਣੀ ॥ ਛਲਾ ਆਛਲਾ ਈਸੁਰੀ
 ਜੋਗ ਜੁਆਲੀ ॥ ਨਮੋ ਬਰਮਣੀ
 ਚਰਮਣੀ ਕੂਰ ਕਾਲੀ ॥੧੭॥੨੩੬॥
 ਨਮੋ ਰੇਚਕਾ ਪੂਰਕਾ ਪ੍ਰਾਤ ਸੰਧਿਆ ॥
 ਜਿਨੈ ਮੋਹ ਕੈ ਚਉਦਹੂੰ ਲੋਕ ਬੰਧਿਆ ॥
 ਨਮੋ ਅੰਜਨੀ ਗੰਜਨੀ ਸਰਬ ਅਸਤ੍ਰਾ ॥
 ਨਮੋ ਧਾਰਣੀ ਬਾਰਣੀ ਸਰਬ ਸਸਤ੍ਰਾ
 ॥੧੮॥੨੩੭॥ ਨਮੋ ਅੰਜਨੀ ਗੰਜਨੀ
 ਦੁਸਟ ਗਰਬਾ ॥ ਨਮੋ ਤੋਖਨੀ ਪੋਖਨੀ
 ਸੰਤ ਸਰਬਾ ॥ ਨਮੋ ਸਕਤਣੀ ਸੂਲਣੀ

ਖੜਗ ਪਾਣੀ ॥ ਨਮੋ ਤਾਰਣੀ
 ਕਾਰਣੀਅੰ ਕ੍ਰਿਪਾਣੀ ॥੧੯॥੨੩੮॥
 ਨਮੋ ਰੂਪ ਕਾਲੀ ਕਪਾਲੀ ਅਨੰਦੀ ॥
 ਨਮੋ ਚੰਦ੍ਰਣੀ ਭਾਨਵੀਅੰ ਗੁਬਿੰਦੀ ॥ ਨਮੋ
 ਛੈਲ ਰੂਪਾ ਨਮੋ ਦੁਸਟ ਦਰਣੀ ॥ ਨਮੋ
 ਕਾਰਣੀ ਤਾਰਣੀ ਸ੍ਰਿਸਟਿ ਭਰਣੀ
 ॥੨੦॥੨੩੯॥ ਨਮੋ ਹਰਖਣੀ ਬਰਖਣੀ
 ਸਸਤ੍ਰ ਧਾਰਾ ॥ ਨਮੋ ਤਾਰਣੀ ਕਾਰਣੀਅੰ
 ਅਪਾਰਾ ॥ ਨਮੋ ਜੋਗਣੀ ਭੋਗਣੀ ਪ੍ਰਮ
 ਪ੍ਰਗਿਆ ॥ ਨਮੋ ਦੇਵ ਦਈਤਿਆਇਣੀ
 ਦੇਵਿ ਦੁਰਗਿਆ ॥੨੧॥੨੪੦॥ ਨਮੋ

ਘੋਰ ਰੂਪਾ ਨਮੋ ਚਾਰ ਨੈਣਾ ॥ ਨਮੋ
 ਸੂਲਣੀ ਸੈਥਣੀ ਬੱਕ ਬੈਣਾ ॥ ਨਮੋ ਬ੍ਰਿਧਿ
 ਬੁੱਧੰ ਕਰੀ ਜੋਗ ਜੁਆਲਾ ॥ ਨਮੋ ਚੰਡ
 ਮੁੰਡੀ ਮ੍ਰਿਤਾ ਕੂਰ ਕਾਲਾ ॥੨੨॥੨੪੧॥
 ਨਮੋ ਦੁਸਟ ਪੁਸਟਾਰਦਨੀ ਛੇਮ ਕਰਣੀ
 ॥ ਨਮੋ ਦਾੜ੍ਹ ਗਾੜਾ ਧਰੀ ਦੁਖਯ ਹਰਣੀ
 ॥ ਨਮੋ ਸਾਸਤ੍ਰ ਬੇਤਾ ਨਮੋ ਸਸਤ੍ਰ ਗਾਮੀ
 ॥ ਨਮੋ ਜੱਛ ਬਿਦਿਆ ਧਰੀ ਪੂਰਨ
 ਕਾਮੀ ॥੨੩॥੨੪੨॥ ਰਿਪੰ ਤਾਪਣੀ
 ਜਾਪਣੀ ਸਰਬ ਲੋਗਾ ॥ ਥਪੇ ਥਾਪਣੀ
 ਖਾਪਣੀ ਸਰਬ ਸੋਗਾ ॥ ਨਮੋ ਲੰਕੁਤੇਸੀ

ਨਮੋ ਸਕਤਿ ਪਾਣੀ ॥ ਨਮੋ ਕਾਲਕਾ
 ਖੜਗ ਪਾਣੀ ਕ੍ਰਿਪਾਣੀ ॥੨੪॥੨੪੩॥
 ਨਮੋ ਲੰਕੁੜੇਸਾ ਨਮੋ ਨਾਗਰ ਕੋਟੀ ॥
 ਨਮੋ ਕਾਮ ਰੂਪਾ ਕਮੱਛਿਆ ਕਰੋਟੀ ॥
 ਨਮੋ ਕਾਲ ਰਾਤ੍ਰੀ ਕਪਰਦੀ ਕਲਿਆਣੀ
 ॥ ਮਹਾਂ ਰਿੱਧਣੀ ਸਿੱਧ ਦਾਤ੍ਰੀ ਕ੍ਰਿਪਾਣੀ
 ॥੨੫॥੨੪੪॥ ਨਮੋ ਚਤਰ ਬਾਹੀ ਨਮੋ
 ਅਸਟਬਾਹਾ ॥ ਨਮੋ ਪੋਖਣੀ ਸਰਬ
 ਆਲਮ ਪਨਾਹਾ ॥ ਨਮੋ ਅੰਬਕਾ ਜੰਬਹਾ
 ਕਾਰਤਿਕਯਾਨੀ ॥ ਮ੍ਰਿੜਾਲੀ ਕਪਰਦੀ
 ਨਮੋ ਸ੍ਰੀ ਭਵਾਨੀ ॥੨੬॥੨੪੫॥ ਨਮੋ

ਦੇਵ ਅਰਦਯਾਰਦਨੀ ਦੁਸਟ ਹੰਤੀ ॥
 ਸਿਤਾ ਅਸਿਤਾ ਰਾਜਕ੍ਰਾਂਤੀ ਅਨੰਤੀ ॥
 ਜੁਆਲਾ ਜਯੰਤੀ ਅਲਾਸੀ ਅਨੰਦੀ ॥
 ਨਮੋ ਪਾਰਬ੍ਰਹਮੀ ਹਰੀ ਸੀ ਮੁਕੰਦੀ
 ॥੨੭॥੨੪੬॥ ਜਯੰਤੀ ਨਮੋ ਮੰਗਲਾ
 ਕਾਲ ਕਾਯੰ ॥ ਕਪਾਲੀ ਨਮੋ ਭੱਦ੍ਰਕਾਲੀ
 ਸਿਵਾਯੰ ॥ ਦੁਰਗਾਯੰ ਛਿਮਾਯੰ ਨਮੋ
 ਧਾਤ੍ਰੀਏਯੰ ॥ ਸੁਆਹਾ ਸੁੱਧਾਯੰ ਨਮੋ
 ਸੀਤਲੇਯੰ ॥੨੮॥੨੪੭॥ ਨਮੋ ਚਰਬਣੀ
 ਸਰਬ ਧਰਮੰ ਧੁਜਾਯੰ ॥ ਨਮੋ ਹਿੰਗੁਲਾ
 ਪਿੰਗੁਲਾ ਅੰਬਕਾਯੰ ॥ ਨਮੋ ਦੀਰਘ

ਦਾੜਾ ਨਮੋ ਸਿਆਮ ਬਰਣੀ ॥ ਨਮੋ
 ਅੰਜਨੀ ਗੰਜਨੀ ਦੈਤ ਦਰਣੀ
 ॥੨੯॥੨੪੮॥ ਨਮੋ ਅਰਧ ਚੰਦ੍ਰਾਇਣੀ
 ਚੰਦ੍ਰ ਚੂੜੰ ॥ ਨਮੋ ਇੰਦ੍ਰ ਊਰਧਾ ਨਮੋ
 ਦਾੜੁ ਗੂੜੁ ॥ ਸਸੰ ਸੇਖਰੀ ਚੰਦ੍ਰਭਾਲਾ
 ਭਵਾਨੀ ॥ ਭਵੀ ਭੈਹਰੀ ਭੂਤਰਾਟੀ
 ਕ੍ਰਿਪਾਨੀ ॥੩੦॥੨੪੯॥ ਕਲੀ
 ਕਾਰਣੀ ਕਰਮ ਕਰਤਾ ਕਮੱਛਿਆ ॥
 ਪਰੀ ਪਦਮਨੀ ਪੂਰਣੀ ਸਰਬ ਇੱਛਿਆ
 ॥ ਜਯਾ ਜੋਗਨੀ ਜੱਗ ਕਰਤਾ ਜਯੰਤੀ ॥
 ਸੁਭਾ ਸੁਆਮਣੀ ਸ੍ਰਿਸਟ ਜਾ ਸਤੁ ਹੰਤੀ

॥੩੧॥੨੫੦॥ ਪਵਿੱਤ੍ਰੀ ਪੁਨੀਤਾ
 ਪੁਰਾਣੀ ਪਰੇਯੰ । ਪ੍ਰਭੀ ਪੂਰਣੀ ਪਾਰ
 ਬ੍ਰਹਮੀ ਅਜੇਯੰ ॥ ਅਰੂਪੰ ਅਨੂਪੰ ਅਨਾਮੰ
 ਅਠਾਮੰ ॥ ਅਭੀਤੰ ਅਜੀਤੰ ਮਹਾ ਧਰਮ
 ਧਾਮੰ ॥੩੨॥੨੫੧॥ ਅਛੇਦੰ ਅਭੇਦੰ
 ਅਕਰਮੰ ਸੁ ਧਰਮੰ ॥ ਨਮੋ ਬਾਣ ਪਾਣੀ
 ਧਰੇ ਚਰਮ ਬਰਮੰ ॥ ਅਜੇਯੰ ਅਭੇਯੰ
 ਨਿਰੰਕਾਰ ਨਿੱਤਿਯੰ ॥ ਨਿਰੂਪੰ ਨਿਰਬਾਣੰ
 ਨਮਿੱਤਿਯੰ ਅਕਿੱਤਿਯੰ ॥੩੩॥੨੫੨॥
 ਗੁਰੀ ਗਉਰਜਾ ਕਾਮਗਾਮੀ ਗੁਪਾਲੀ ॥
 ਬਲੀ ਬੀਰਣੀ ਬਾਵਨਾ ਜੱਗਯਾ ਜੁਆਲੀ

॥ ਨਮੋ ਸਤੁ ਚਰਬਾਇਣੀ ਗਰਬ ਹਰਣੀ
 ॥ ਨਮੋ ਤੋਖਣੀ ਸੋਖਣੀ ਸਰਬ ਭਰਣੀ
 ॥੩੪॥੨੫੩॥ ਪਿਲੰਗੀ ਪਵੰਗੀ ਨਮੋ
 ਚਰ ਚਿਤੰਗੀ ॥ ਨਮੋ ਭਾਵਨੀ ਭੂਤ ਹੰਤਾ
 ਭੜਿੰਗੀ ॥ ਨਮੋ ਭੀਮ ਰੂਪਾ ਨੋਮ ਲੋਕ
 ਮਾਤਾ ॥ ਭਵੀ ਭਾਵਨੀ ਭਵਿਖਯਾਤਾ
 ਬਿਧਾਤਾ ॥੩੫॥੨੫੪॥ ਪ੍ਰਭੀ ਪੂਰਣੀ
 ਪਰਮ ਰੂਪੰ ਪਵਿਤ੍ਰੀ ॥ ਪਰੀ ਪੋਖਣੀ
 ਪਾਰਬ੍ਰਹਮੀ ਗਾਇਤ੍ਰੀ ॥ ਜਟੀ ਜੁਆਲ
 ਪ੍ਰਚੰਡ ਮੁੰਡੀ ਚਮੁੰਡੀ ॥ ਬਰੰ ਦਾਇਣੀ
 ਦੁਸਟ ਖੰਡੀ ਅਖੰਡੀ ॥੩੬॥੨੫੫॥

ਸਬੈ ਸੰਤ ਉਬਾਰੀ ਬਰੰ ਬਯੂਹ ਦਾਤਾ ॥
ਨਮੋ ਤਾਰਣੀ ਕਾਰਣੀ ਲੋਕ ਮਾਤਾ ॥
ਨਮਸਤਯੰ ਨਮਸਤਯੰ ਨਮਸਤਯੰ ਭਵਾਨੀ
॥ ਸਦਾ ਰਾਖ ਲੈ ਮੋ ਕ੍ਰਿਪਾ ਕੈ ਕ੍ਰਿਪਾਨੀ
॥੩੭॥੨੫੬॥

ਇਤਿ ਸ੍ਰੀ ਬਚਿਤ੍ਰ ਨਾਟਕੇ ਚੰਡੀ ਚਰਿਤ੍ਰੇ ਦੇਬੀ ਜੂ
ਕੀ ਉਸਤਤ ਬਰਨਨੰ ਸਪਤਮੋ ਧਿਆਇ ਸੰਪੂਰਣੰ
ਮਸਤੁ ਸੁਭ ਮਸਤੁ ॥੭॥

ਅਫਜੂ ॥

ਅਥ ਚੰਡੀ ਚਰਿਤ੍ਰ ਉਸਤਤ ਬਰਨਨੰ ॥
ਭੁਜੰਗ ਪ੍ਰਯਾਤ ਛੰਦ ॥

ਭਰੇ ਜੋਗਣੀ ਪੜ੍ਹ ਚਉਸਠ ਚਾਰੰ ॥

ਚਲੀ ਠਾਮ ਠਾਮੰ ਡਕਾਰੰ ਡਕਾਰੰ ॥ ਭਰੇ

ਨੇਹ ਗੇਹੰ ਗਏ ਕੰਕ ਬੰਕੰ ॥ ਰੁਲੇ ਸੂਰ

ਬੀਰੰ ਅਹਾੜੰ ਨ੍ਰਿਸੰਕੰ ॥੧॥੨੫੭॥

ਚਲੇ ਨਾਰਦਊ ਹਾਥ ਬੀਨਾ ਸੁਹਾਏ ॥

ਬਨੇ ਬਾਰਦੀ ਡੰਕ ਡਉਰੂ ਬਜਾਏ ॥

ਗਿਰੇ ਬਾਜਿ ਗਾਜੀ ਗਜੀ ਬੀਰ ਖੇਤੰ ॥

ਰੁਲੇ ਤੱਛ ਮੁੱਛੰ ਨਚੇ ਭੂਤ ਪ੍ਰੇਤੰ

॥੨॥੨੫੮॥ ਨਚੇ ਬੀਰ ਬੈਤਾਲ ਅੱਧੰ

ਕਮੱਧੰ ॥ ਬਧੇ ਬੱਧ ਗੋਪਾਂ ਗੁਲਿਤ੍ਰਾਣ

ਬੱਧੰ ॥ ਭਏ ਸਾਧ ਸੰਬੂਹ ਭੀਤੰ ਅਭੀਤੇ

॥ ਨਮੋ ਲੋਕ ਮਾਤਾ ਭਲੇ ਸਤੁ ਜੀਤੇ
 ॥੩॥੨੫੯॥ ਪੜ੍ਹੇ ਮੂੜ੍ਹੁ ਯਾ ਕੋ ਧਨੰ
 ਧਾਮ ਬਾਢੇ ॥ ਸੁਨੈ ਸੁਮ ਸੋਫੀ ਲਰੈ ਜੁੱਧ
 ਗਾਢੇ ॥ ਜਗੈ ਰੈਣਿ ਜੋਗੀ ਜਪੈ ਜਾਪ ਯਾ
 ਕੋ ॥ ਧਰੈ ਪਰਮ ਜੋਗੰ ਲਹੈ ਸਿੱਧਤਾ ਕੋ
 ॥੪॥੨੬੦॥ ਪੜ੍ਹੈ ਯਾਹਿ ਬਿੱਦਯਾਰਥੀ
 ਬਿੱਦਯ ਹੇਤੰ ॥ ਲਹੈ ਸਰਬ ਸਾਸਤ੍ਰਾਨ ਕੋ
 ਮੱਧਯ ਚੇਤੰ ॥ ਜਪੈ ਜੋਗ ਸਨਯਾਸ
 ਬੈਰਾਗ ਕੋਈ ॥ ਤਿਸੈ ਸਰਬ ਪੁੰਨਯਾਨ
 ਕੋ ਪੁੰਨ ਹੋਈ ॥੫॥੨੬੧॥

ਦੋਹਰਾ ॥ ਜੇ ਜੇ ਤੁਮਰੇ ਧਿਆਨ ਕੋ
ਨਿੱਤ ਉਠਿ ਧਿਐ ਹੈਂ ਸੰਤ ॥ ਅੰਤ ਲਹੈਂ
ਗੇ ਮੁਕਤਿ ਫਲੁ ਪਾਵਹਿਗੇ ਭਗਵੰਤ
॥੬॥੨੬੨॥

ਇਤਿ ਸ੍ਰੀ ਬਚਿਤ੍ਰ ਨਾਟਕੇ ਚੰਡੀ ਚਰਿਤ੍ਰੇ ਚੰਡੀ
ਚਰਿਤ੍ਰ ਉਸਤਤ ਬਰਨੰ ਅਸਟਮੋ ਧਿਆਇ
ਸੰਪੂਰਨ ਮਸਤੁ ਸੁਭ ਮਸਤੁ ॥੮॥

॥ ਅਫਜੂ ॥